

李丈撫虹八詠晉六壽慶

金風玉露桂初香，喜拜華堂老伯陽。啓後承先春睡意，以文會友嶺南強。靈椿鬱鬱山河壽，皓髮蕭蕭日月長。翰墨因緣容結願，期頤詩酒約葵鄉。

春睡乃高劍父先生畫苑名文為高先生門下傳人

丁卯秋暮與邑會各屬校校長十一人教席二十七人專程回里道賀順德華僑中學三十周年校慶并訪問各鄉學之後登臨名勝多處得句二律以與同行一笑

青雲公園

秋暮蠶鄉尚綠疇，喜乘嘉會一聯游。山容遠近迎人笑，塔影高低逐水流。拾級方思扶後進，憑闌細認繼前修。倚天孰有登臨感，不問功名問樂憂。

西山廟

西山信是地之靈，夙盛民間薦德馨。殿宇重光忘歷劫，榕陰無恙喜常青。玉泉流出新題字，文物臚陳舊刻銘。頗覺神明如在上，思親亭畔響風鈴。

湖南省株洲日報創刊三十周年紀慶

一紙風行三十年，金聲玉振起南天。匡時有賴名山業，繼往開來覺世篇。

登桂洲獅子山公園同李本立梁耀明胡錦超

玉石雕成百步梯，喜開新貌接雲泥。山形獅子揚神壯，閣起青霄覽物齊。秀甲一方村裏外，橋通兩岸水東西。斜陽爲我頻舒眼，文筆相望認舊題。

登桂洲文塔

安定當年聚族居，留將一塔閱盈虛。非關子弟爭高下，所望桑田富米魚。歷久倍思須愛物，而今況有可停車。天時尚賴人和濟，遙接青雲信亦如。

過岑學呂先生故居

故宅重開古巷前，歸來低首拜先賢。堂題敦睦數金碧，井刻思源起綠煙。無限人琴縈往事，不勝今昔誦遺篇。傳家傳世終償願，子子孫孫自樂天。

順風山旅游中心仙泉酒店開幕喜會黎雄才畫師

乍見真疑蜃氣沖，人間竟有此仙宮。環山不異阿房出，大道如由碧落通。鑿石疏泉龍虎勢，雕甍繡闥漢唐風。擘窠正賞新題字，喜晤高賢冠蓋中。

仙泉二字乃黎畫師命筆

免年餞臘月宮樓

歲闌又喜會詩儔，茶酒隨緣各盡甌。正爲梅花吟復飲，卻憐駒隙去難留。一年株守容無計，兩岸聲傳總有由。天運循環春在望，滿懷心願起從頭。

戊辰上元節夜觀亞洲電視直播省港鳳城慶元宵

一九八八年

海隅客寓一螢光，髣髴因人縮地方。月下燈花爭煥發，民間鑼鼓復丁當。如聞爆竹樓頭響，忽見龍舟陸上航。難得南音還獨唱，春宵同賞老街坊。

訪意蘭畫舍佛酒居士同叔惠秉昌居士於養疴中以五十年前自畫象相示苦樂頓忘

檀几竹簾自在居，蘭風幾葉養真如。平生宿具菩提願，一笑仍難老病除。天相善人先孝行，筆開生面尚春餘。撤環不讓北宮女，苦樂能忘賴畫書。

居士以儒入佛畢生撤其環瑱以盡孝於親其尊人張詠琴公乃壽享一百零二歲

題余綿生寫雙鵝瑞卉

花開初夏一湖汀，日午忽來兩雪翎。再世右軍如可遇，等閒換得黃庭經。

題余綿生寫杜鵑花

芳菲一角下瑤臺，脂粉畧傳風晚來。始自何時稱躑躅，李唐曾並牡丹開。

潘淑俊師生畫展應陳乃殷之屬

六法顯精研，天風一脈傳。天桃穠李日，灼灼花朝前。

題胡仿石蔬果圖

學農學圃學無窮，揮筆蒞蔬意亦同。忽念菩提非是樹，餐英啖荔也空空。

贈黎鑑樞譚慕貞伉儷

端木長才管煇倚，早諧相敬復相攸。百工向賴成其事，諸弟幾從爭上游。信是前身勤讀織，乃能斯世並齊修。多年憂樂情深淺，盡在春風滿畫樓。

慕貞女士乃芳鄰譚洪儀掌珠任教津校
閒習繪事聯展大會堂其婿黎從業五金

席上爲鴻社雅集課題步傳靜菴社盟韻

他鄉又是惜春時，性喜盃中願未移。安得花間長對月，常於樽畔共題詩。未妨龍飲誇無敵，惟類鯨吞總不宜。有約相過即勝會，奚須琥珀與瓊卮。

錦山文社春楔十七會集前會李雲谷劉秉衡余少騫陳祖曦江麟衛燕山梁鏗齋羅鶴鳴諸翁句不遺在遠邀吟侶，煙景春閒少長臨。香海夙依江左俗，錦山猶似會稽陰。祓除沴戾迎祥瑞，消受鳴禽報好音。畢竟蘭亭非絕響，年年此際樂無禁。

韓丈穗軒杖朝之慶步韻奉壽

昌黎傳世學，豹隱醉晴陰。當年窮案牘，於茲一閒襟。無量酣麴蘖，有約廣苔岑。庭階芳蘭桂，室家滿好音。康強諧白首，如玉復如金。瀛寰遍杖履，風雨付微吟。潤屋潤身餘，勸學眷黎黔。香江流渭水，同羨百年心。

白雲山遠眺應楸社盟長潘新安命題

摩斗復橫空，天南一岱宗。遙迤接大庾，噴薄出歸龍。宿昔鼇頭會，當年景泰鐘。依稀蒲澗水，猶共白雲封。歸龍溪名在昔白雲寺之左其上飛流百仞盤舞噴薄

廣東詩詞學會黃施民蒞港鏗齋東道招飲鳳城酒家同座荆翁夫婦羅忼烈饒選堂金堯如會敏之潘新安陳秉昌劉崇梁蔚熙一座春風黃翁有詩以紀盛會次韻酬之

市樓一醉酒仙樓，春暮江南宛畫題。坐賞龍年雲雨夜，遙看鯉峽浪花低。燈前樽畔忘賓主，今是昨非論覺迷。天若有情容再會，不辭剪燭又窗西。

蘊廬師生書畫展

龍山多瑞氣，海角播春風。百尺樓臺上，一堂冠蓋中。詩人剛送節，筆陣又稱雄。荔熟荷香雨，芳菲倍滿叢。

周曰如昆仲周千秋畫師同紀先德在禺山合建焯雯幹卿二公文教體育館次千秋韻奉賀
堂構重光盛世年，聿修厥德手相牽，禺山夙廣濂溪學，繼述長開日月邊。

趙大鈍雪梨來書有詩次韻即寄

五年兩度唱陽關，萬里悠悠一夢間。難得秋風仍有待，數行魚雁耀吾顏。

吳天任書便面春望一律見贈次韻奉答

炎炎安得綠成圍。偶立芳菲亦庶幾。久客未忘燈下讀，棲心常羨鳥高飛。卻憐有願乘風去，可奈無端與力違。忽展清涼落珠玉，多君爲我拂前非。

立秋日偕內人吳孫文禮與邑會同人一行二十四衆赴賀檳城順德會館創立一百五十周年

大慶藉賞南國風光首途星洲於航機上占

金風甫拂鯉門波，四度南飛意若何。萬里鄉情攜手去，滿懷心願欲天摩。茫茫宇宙方窗小，歷歷僑聲異地多。雲水幾重山幾片，獅城如錦又重過。

黑風洞

細雨別芙蓉，輕車過黑風。童孫爭拾級，老眼幻迷宮。終歲無寒暑，環巖踞虎熊。仰觀如坐井，一鏡突光中。
芙蓉爲馬來西亞森美蘭州首府有順德會館計先後四度過訪

霹靂洞

水秀山明古霸羅，客途陡覺桂林過。洞天當日原滄海，勝境於今列佛陀。頗學敦煌稽古意，遙將蘆笛送秋波。有緣結得重來願，且步前人一放歌。

霹靂州首府曰怡保舊名霸羅山水奇秀
華人稱為小桂林洞有南國敦煌雅號

極樂寺

含瀑凭霄白鶴山，檳榔西北起禪關。峰巒遠近排排笏，樓閣參差曲曲閑。一塔莊嚴千萬佛，諸天彷彿兩三彎。登臨若有歸真想，底事吾僑久服蠻。

寺上有萬佛寶塔一座七級周圍滿繪佛像信足萬數清淨地應無妄語也

許仍先生九秩開一壽慶

龍年獻瑞桂飄香，渭水籌添喜日長。早譽銀臺操左券，晚浮碧海浴冬陽。喬高百尺松同茂，戶納三多世永昌。寶婺長庚齊煥采，華堂歲歲晉桃觴。

馬來西亞沙巴順德同鄉會創立六十三周年暨新廈落成紀慶

海外友僑賢，花甲晉三年。開來多勵策，繼往展新篇。華堂基萬載，獅鼓響南天。

曉雨聽荷愉社雅集季哲命題

花本無聲，如何可聽。天橫白露，翠蓋漸零。脂殘粉脫，顛倒落英。濂溪遠矣，空餘香清。一朝風雨，萬里淋鈴。或徐或急，或擊之鳴。如泣如訴，如怨遠征。誰家碧玉，同抱不平。

迎幹宗兄以蟬與荷花參展美國休士頓畫會獲選賦此賀之

一管丹青出鳳城，嶺南門下早蜚聲。依仁游藝希賢哲，入妙通靈自性情。法啓天然融物象，神來紙上起蟬鳴。折衷中外揚寰宇，寫到荷香遠益清。

九日登石硤尾公園

昔年回祿尚留痕，佳節登臨若夢身。多少清晨行健客，有無當日過來人。卻憐房屋臨時久，未與園林又日新。鑿石踈泉青草地，風光如此總棲神。

一九五四年石硤尾木屋大火災情嚴重
曾震動一時臨時房屋區多處至今尚存

敬羣宗丈以跌失養傷中詩寄示即依韻奉候丈年方八六

清江香海任炎涼，名重韓康復上庠。既述尼山明格物，還從釋氏悟無常。嵩齡此日當扶杖，安步何期若履霜。天福善人神亦護，漫因腰腳廢吟章。

桂洲獅山公園文娛晚會

鳳蕭獅鼓夜，嘉會起鄉關。煙火爭沖漢，人潮欲淹山。依稀響仙籟，隱約和縉蠻。如此昇平象，得來豈等閒。

琴音愉社雅集伯祺盟長命題

流水高山自古今，只難相遇是知音。月明安得松間坐，人散常留夢裏尋。未必有絃皆亂耳，如何無淚不沾襟。從來多少爲民牧，治邑能同子賤心。

馬來西亞廣東會館聯合會四十二周年會慶賀辭

忠信早行州里，流風遠播南天。一堂少長咸集，百粵聲氣雲連。

太乙樓主劉丈少旅印所藏近代閩秀名家書畫集屬題

宛印清江秋月，如繡沃野春風，不是詠絮林下，便曾觀劍庭中。

戊辰月宮樓餞臘

一夢羅浮發幾枝，他鄉又近歲除時。天寒鯉峽多忙權，日暮鑪峰漸落旗。急景漫愁龍去夜，好春正待燕歸期。敢將臘酒邀同醉，不論升沉只論詩。

隔田邨謝墟春酌并序

己巳上元次日王曉春女士自揚州來小敘於此同座黃丈少波梁鏗齋夫婦謝季哲夫婦陳秉昌劉紹進李鴻烈高倬雲暨內子吳肖穎皆辛酉之春五湖同游吟侶也屈指閱八年矣紅霧重重過隔田，一樓佳氣喜聯翩。銀花火樹通宵後，煙景文章落酒邊。座上沉來千里客，燈前笑邁八春天。停杯且問揚州月，風采於今勝往年。

潘妙蘭從黃丈維瑁學書從趙師少昂學畫有成展於香港大會堂

衛管同參韻欲流，成文比象法金鈞。一堂山谷天風意，活色生香綠滿洲。

歐豪年朱慕蘭伉儷旋港小敘環球菜館

欲暖還寒柳漸知，鶯花兩岸惜芳時。東來紫燕雙飛日，北望情天總有詩。片晌相逢皆宿分，十年無負此心儀。嶺南吾亦師門下，何日能隨洗硯池。

容奇鄉土風情畫展觀後節近清和展於香港名家藝術中心

隱隱二山光，縮龍出斗方。一橋橫古渡，重戶列祠堂。眾妙開新象，流風播遠航。當前工業地，本盡米魚桑。

一橋指容奇大橋橫跨德勝海直通縣治大良遠航指順德號順風號兩客船每日由容奇港往來香港民間又常言順德祠堂南海廟故云

題胡仿石宮扇畫集

咫尺之間萬里遙，復疑禪雀出南朝。桂花開處如團月，仙袂飄飄下九霄。

輓姊丈譚叶麟歿於穗垣治喪殯儀館在黃花岡畔甥建球遠居英國謀生二十八年未返矣

暑氣炎炎雨乍飄，天人同淚混成潮。堂前燭影哀明滅，岡畔花魂盡悴憔。遺念定深游子遠，浮生同感命途遙。憂憂樂樂君先息，無限悲傷話往朝。

余丈少飄自穗寄示己巳消夏次韻奉酬并呈槐堂

炎炎長夏日，心靜自如如。水淺源猶遠，雲開雨漸疏。知常即知足，居易便居諸。莫道無芳草，步安當我車。

爲顧植槐題所藏蘇仁山繪修元史圖

鄉先輩仁山常以香脚作畫乃有畫怪雅號二樵亦嘗用雞毛作筆皆前無古人

香脚雞毛各異常，如何世許二樵強。焦濃若灑宵深雨，雅澹疑呈地上霜。意會淵明詩亦逸，書宗元素墨彌香。雖披付得高人賞，三絕終隨石鼎揚。

黎二樵先生別號石鼎老人

秋涼爲愉社雅集課題步黎晉偉韻

難得閒來會市樓，幾人相笑鬢先秋。能於物外皆隨意，自覺樽前盡解愁。遠望江天涼有訊，佇看霜露潤盈溝。漫因一葉梧桐落，心與西風逐水流。

小山居士居可招飲同賴恬昌梁鏗齋潘小磐梁子江曾榮光常宗豪李鴻烈等

金風玉露月迷茫，畫閣詩書接李唐。坐列經筵皆舊識，簾開燈火滿秋光。何緣雅得三分醉，有酒先斟九日黃。不異塘西長處樂，多君惠我養生方。

堂上有溫肅太史撰賴際熙太史書聯云
居之安則資之深可處約亦長處樂

又一村花園俱樂部小敘與家叔惠幼惠蘇文擢陳伯祺陳乃殷陳一豫許衍董李國明潘兆賢
黃福銓

瀟瀟秋雨濕輕襟，小會何勞遠道尋。燈火萬家林外夜，晤言一室酒邊吟。舉盃莫問誰儒佛，放眼姑忘孰古今。品柳評花餘韻在，隨緣一笑亦知音。

鄉彥毛潤添徐丹巫映張介關宗漢余曼陶羅漢榮葉其青何堂自鳳城來與鏗齋餘菴冠樵文

顯秉昌植發遠足昂平復探聽曉山房主人鏗齋伉儷殷勤款待挑燈置酒賓主盡歡而別
汗漫名山覺亦迷，輕車又向日之西。一彎盡是回頭岸，十里中開處士題。林木喜經風雨後，

主人情與水天齊。江山如此雲心遠，斯會何時復酒難。

秋薦張紱詩步念因韻

習習西風片片雲。宜亭又漸月華新。卻憐兜率虛空界，竟有中郎夢裏人。海誓在天曾比翼，花飛何事早歸真。春秋佳日魂誰寄，一畫一詩世永珍。

羅冠樵邢寶莊各繪鍾馗像贈邑會書此記之

不捷終無愧色，嫉惡極明其心。歲暮端陽靈見，自唐相傳至今。世有瑜亮妙筆，能將道子神尋。外表虬髯虎目，魑魅魍魎不侵。內韞照人肝膽，萬家福待引臨。

美加第十一行得句九首

荷李活片場

天涯落落路悠悠，十五年前認舊游。無限風光隨物換，不齊氣候似川流。趨新忽又回中古，縮地真疑占半球。如此乾坤何所意，撐天沉陸在人謀。

羅省西湖村湖畔

由來天下幾雷同，一樣波平漾碧空。入畫雖無蘇白跡，宜詩頗有惠杭風。秋深山色環湖遠，雨後霜林倒影中。數點閒鷗如欲語，留吾此地作漁翁。

示季男夫婦

羅城重敘又深秋，小築依山綠尚稠。多少艱難開此地，幾回風月上層樓。長松當戶宜偕老，晚菊流香合與儔。所願吾兒知本末，居夷尤貴在齊修。

加拿大鐵路華工紀念像

一九八九年秋建于多市總站與天虹體育館之間以紀一八八零年至一八八五年來自中國廣東省參加此建造橫貫加國東西交通之勞役之一萬七千多名華僑因工作艱險而意外身亡者有四千餘名工程完竣仍流連道旁老死於此者不知凡幾像下有碑記之行路誰知築路難，百年往事總斑斑。幾流血汗方熔鐵，長作髑髏爲鑿山。如此孤魂羈異域，何時淚史載鄉關。迎風矗立英雄像，窮望洛磯安水間。

多市新光酒樓小敘喜晤中加文化交流協會安省中國美術協會湖楓詩社諸僑彥有陳魯

慎勞允澍陳浪平郭英殊鄺譔伍彞生陶灃羅潔蘊馬笑如陳文光何百里馬兆麒等

異鄉難得酒同斟，坐賞人間重晚林。閒話莫嫌秋後扇，羈懷可有歲寒心。關山遠望情何似，萍水相逢願亦深。會得安湖鷗鷺意，且忘天地幾浮沉。

贈馬笑如鄉媛與其夫婿陳文光院長笑如有畫室授徒文光創立陳氏太極拳學院
鯤鵬少日志，梁孟百年心。幾歷愁風雨，未妨樂瑟琴。健行昌易學，繪事滿楓林。相敬有
餘畧，能無去國吟。

密西沙加中國城巡禮值香港貿易發展局於此展開宣傳兩地推廣貿易有中國民間藝術文
娛節目表演助慶以娛樂遊人

畫桷飛簷玉宇開，巍峨仿向故都來。環城百業皆新象，一壁九龍亦美哉。中起天聲同樂此，
共謀大道以生財。喜看忠信行蠻貊，冉冉東風遍廣臺。

士嘉堡晨步途遇不少孫輩同學負笈趨校

客中忘曆日，晨步漫西東。天欲三分白，林飄二月紅。奇花猶晚節，細草耐寒風。忽起兒
時願，從頭作學童。

多市高塔旋轉餐廳小坐

正襟危坐塔之顛，彈指光陰又十年。一望湖山皆舊識，四圍景物待冬眠。楓飛不盡飄零感，
日落空餘寂寞煙。旁坐妻兒心似我，何時世界一情天。

沈仲強張端儀百齡雙明壽寄沈厚韶美國

人間歲歲菊黃，趙管樂樂天堂。百年比翼願足，千秋永播芬芳。

題鄧芬遺作雙駿圖爲采薇樓主潘兆賢

一雙八尺龍，底事倦雲從。有幸依芳草，留將伯樂逢。

中華孔子學會于行前自京訪港與荆翁伉儷宗衍文攢鏗齋衍董秉昌同敘市樓

立禮興仁本正由，甚因泗水每橫流。百年此地看今昔，一往何由有樂憂。難得燈前舒倦眼，
笑談儒學共高樓。雲天北望重重路，大道依然貫九州。

羅冠樵畫展賦賀

一管丹青積健雄，曹衣吳帶出唐宮。天南歷歷栽桃李，鳳嶺龍津接古風。

陳培畧師生畫展

海澨嘉平欲煖天，一堂桃李占春先。寒梢幾度三冬日，佳氣喜開兩岸煙。造化有情皆畫意，湖山無處不詩篇。成文比象荆關筆，眾妙紛披接馬年。

黃文維瑁九秩壽慶

江夏宗風遠，涪州翰墨香。淵源流有自，眉壽慶無疆。桃李欣欣秀，芝蘭世世昌。眾星許未座，歲歲願稱觴。

昌社己巳餞歲

同道復相謀，樽移鑽石樓。願因長處樂，足爲友聲求。詩酒雖無盡，光陰不可留。一年逢餞臘，以約又分籌。

庚午上元節是日適爲李文撫虹舉殯之期鏗齋有喪明之痛也

公元一九九零年

年年佳節總洋洋，日暖融融忽驟涼。早送伯陽歸上界，晚傳子夏痛詩腸。忍教天際三分月，愁對春醪一盞香。窗外不知哀與樂，萬家燈火正尋常。

青松觀道長侯寶垣素酌招邀同荆翁伉儷周千秋伉儷黃蘊玉潘餘菴陳秉昌邢寶莊等

松風竹影尚輕寒，聯袂玄都拄杖看。歷歷山川今古意，重重殿宇畫圖般。園蔬細味皆珠玉，萍水相逢亦膽肝。好鳥上林方互語，棲心惟願一枝安。

燕

花信初回綠漸深，社前社後又來尋。隨風招展差池羽，逐隊呢喃下上音。穿柳分梁方得意，銜泥啄草總勞心。春光莫問何時老，一片痴情望護林。

周千秋梁粲纓伉儷杖朝杖國雙壽畫展

德合乾坤象，星輝極婺天。渭濱方坦蕩，林下亦神仙。共展生花筆，同迎頌阜篇。春風桃李日，枝葉滿堂前。

七十生朝書懷

耳順虛延又十春，年來漸惜齒依唇。任教鏡裏添新色，猶是花間愛舊醇。相敬固輸梁孟後，治生更乏鮑陶津。兒孫若問從心事，所欲兒孫慎擇鄰。

馬

世路多遙遠，從容萬里行，但求歸有德，奚必力先爭。

哀老僕阿桂

桂本名桂軒黎姓同邑人夫周姓死於抗戰饑饉桂守節自食其力乃自一九四七年起僕吾家護老將離分勞家務至一九八零年退休就養其姪歲仲春病歿東華醫院壽八十五正念故人多暮年，忽傳病軀遽長眠。春深草木真何似，節近清明倍黯然。祿我群兒如骨肉，痛渠一夕冷釵鈿，憑棺只願能來世，無主無賓共粥饘。

上巳

春深夢一般，何處似長安。難得他鄉會，能同晉代看。橫流猶曲水，落日滿闌干，誰覺天之外，依然有苦寒。

漆園家先生逝世二十周年遺作展

望重粉榆一代師，春風如畫雨如詩，一花一葉循循意，桃李芳傳正萬枝。

余丈少飄歿於穗垣賦悼

亦儒亦佛見平生，茗畔忽傳棄杖行，此日當從仙府去，煙花三月別鷗盟。

雲

旭日從龍起，清風出岫來。信知採藥處，常有會仙臺。似錦重重織，如花朵朵栽。未須方大早，始見油然開。

潮汕遊

平（山）深（圳）路上

青草疏林遠近峰，池塘村舍雜農工，離支雨後荷風日，一路車塵向海豐。

抵汕頭市

飛車盡日過潮陽，夜渡榕江水似霜，暮色燈光驚喜外，忽疑汕市是仙鄉。

汕頭國際酒店璇宮旋轉餐廳早茗

憑闌高坐目無窮，清茗當前笑語中，欲問人間今古事，一輪天地萬年同。

韓文公祠

歷階而上拜昌黎，四面雲山天與齊。湘子有橋橫日月，韓江流水自東西。八千里路當年事，萬國衣冠幾舊題。如此風光亦新象。亭臺花木任高低。

祭鱣臺在韓江之濱

一隄如帶一程埃，犯暑尋登祭鱣臺，滾滾江流流不盡，信無醜類可重來。

開元寺遇雨

法雨同沾拜上方，偶留倦步駐經堂，有緣且認開元事，千載誰還鑑晚唐。

洛杉磯西來寺

是否瀛寰遍劫埃，有人攜願竟西來。如何佛法無南北，底事他邦拂樹臺。梵宇重重方始奠，菩提葉葉尚初栽。甚時斯地真清淨，種得蓮花九品開。

黃石公園

十里平湖萬里山，山山水水白雲間。幾流湍練松林出，逐隊翔鷗霧裏還，裂地湯泉無盡處，浮沙危石有醜顏。笑將泉石春秋問。千百年猶一瞬間。

前題之二

漫步湖邊待日臨。松風水氣撲征襟。方觀乳鴨浮深淺。忽羨夷童釣古今。雲淡山高天漸白，鳶飛魚躍頓聯吟。何時卻惹星星火。一燎曾焦百萬林。

前題之三

飛流匯處駕輕舟，彷彿仙槎天上浮。一碧無窮山是畔，千尋拔地世難儔。深臨不測容如海，妙到微茫暑亦秋。如此湖山橋又柳，使人回夢到杭州

經鹽湖城飛多市途中

飛車傍晚過名城，一夜高眠復旅旌。冉冉鹽湖多古意。依依黃石更餘情。得償心願行能健，尚惜人間有未平。日落雲邊燈火處，望中楓國又分明。

市樓喜會僑加文侶

同座有陶澧夫婦郭英殊鄺譔伍彝生鄧瀚鈞馬兆麒陳浪平馬笑如暨其夫婿陳文光

澹蕩天心習習風，一樓促膝倍融融。舉杯莫論誰深淺，遂事姑忘孰異同。斯地未因三伏日，好花猶是去年紅。重逢況是人如玉。幾輩詩雄幾畫翁。

安省中心島公園

魚自浮沉鳥自咻，柳眠花醉一仙洲。繽紛賞玩洋洋起，爛漫風光逐逐流。多少童年爭浴日，萬千遊子總回頭，誰知檻外安湖水，淘得人間幾許愁。

馮康侯九秩明壽遺作暨廣雅書學社同人書法篆刻展覽

養生養性。玉律金科。言爲世法。價重籠鵝。一堂桃李。早沐春和。枝枝葉葉。日愈婆娑。易曰麗澤。詩云琢磨。開來繼往。如江如河。

技以養生藝以養性此道雖小苟得其法亦有可觀此語見馮康侯印集陳秉昌撰引其師之言

秋月

雨後雲初定，秋容滿客襟。信知今夜月。猶是去年心。一面雖遮半。千江尚影深。少焉東嶺上。皎皎照高林。

多倫多中華文化藝術界第三屆詩畫琴棋雅集主理陳浪平屬題

難得皆萍水。異邦尚漢唐。言高規李杜。墨潤法玄黃。齊物鳴三籟。圍枰志四方。遙瞻楓樹國。濟濟滿華堂。

李煥平師生國畫展

象生於意氣雲連。形影分明玉露天。風定方知香在墨。一堂桃李占春先。

贈己故何東爵紳幼女艾齡博士

艾齡又字艾苓學富中西歷長名校桃李滿香江退休後僑居美洲今冬旋港偶會市樓

松身鶴骨尚朱顏。落落真猶海上還。巾幗名揚雖早慕。宮牆外望卻緣慳。今朝何幸天同健。茗畔無拘話亦閒。偶觸風前年欲暮，依然不老是江山。

劉秉衡國畫展

山有神仙水有龍，通靈入妙意重重。一枝當是非凡筆。亦畫亦詩述遠宗。

李福泉師生蘭竹國畫展李師寫有九華竹海一巨幅乃辛酉遊九華山時得此奇壯之景

風晴雨露畫圖天。竹海蘭叢大自然。萬象包羅歸一管。滿堂香氣滿階煙。

龍子鐸國畫展齋署青山堂

彩筆千鈞力。青山一畫堂，坐收天地闊。閒補四時芳。

中華孔子學會陳翀伉儷應香港孔教學院之邀蒞港觀光會於順聯樓頭同座

荆翁伉儷汪丈孝博吳荔莊許衍董家曼菴家沛雄梁鏗齋暨陳秉昌

亦師亦友亦鄉情，談笑惟吾是白丁。天外風雲方莫測，樽前況味儘溫馨。能謀一會皆緣份，漫道相逢盡水萍，有酒渾忘南與北，江山依舊並垂青。

時波斯灣大戰前夕以美英法為首二十八國聯軍正屯兵沙地阿拉伯如箭在弦

公益金百萬行自香港政府大球場起步經藍塘道沿布律徑而抵香港仔郊野公園

終點全程十公里歷三小時而畢其程

十里長程百萬行，人龍旗海似流爭。芸芸幾待沾甘露，步步吾寧讓後生。如此山川皆入畫，何時世界盡修盟。樓臺遠近曾相識，一路惟隨歲月更。

為陳乃殷題人間留得十分春圖中之竹

幾葉瀟湘意，東坡再世身，羣芳同俯仰，千載並傳神。

蔡任平鄉丈八秩晉一壽慶有詩寄示次韻奉祝

有情天地亦心田，明月清風不用錢。幾惠鄉音騰筆墨，遙知懷抱在山川。方思君子宜偕老，喜值長庚耀閏年。萱室椿庭方日永，一花一葉一詩篇。

昌社庚午餞歲送馬迎羊

同座有黃維瑁陳荆鴻劉少旅陳伯祺朱百崑梁其政等

一年容易亦漫漫，幾載琴歌幾缺彈。預卜羊腸通大道，先看馬足躍高關。東流鯉峽仍懷遠，北陟獅峰未覺難。臘酒有緣花有信，江湖原是盡詩壇。

賞桃花愉社課題

公元一九九一年歲辛未

雨潤風香問柳陰，依稀萬里洞中尋。鬚鬚眼眼皆春意，綠綠紅紅接上林。甘實將為王母壽，穠華先展武陵心。枝梢一例萋萋葉，天道何曾別古今。

春日回里參觀順德第一中學與邑會同人暨屬校教師一行一百七十餘衆

幾度重來此德基，一來一恨讀書遲，每懷斯地源流日，益念吾生少賤時。桃李當春方並茂，父兄期我孰深知。承先啓後誰肩任，相見同行盡是師。

觀全邑健兒大良長跑

千百精英力上爭，如龍如虎競飛騰。五山文采呈新象，夾道歡呼祝捷登。不讓鬚眉行亦健。未因先後笑無能。金杯在手當榮耀，畢得全程盡勇朋。

過陳村

省佛陳龍記並稱，當年穀物以時名。因於路上千春意，尚帶盤中一粒情。幾戶工農環水立，四圍籬竹護蘭清。林花似爲遊人笑，搖曳風前若有聲。

北潒河鮮酒家午宴庭前花木林立

橋邊日午酒家來，倚檻臨流亦快哉。萬盞紅棉平地起，一籬黃菊盛春開。村醪未酌心先醉，燕子多情目頓歎。安得時光能許我，烹鮮有暇學盆栽。

周千秋梁榮纓伉儷自北美寄示南極遊詩三十首次其中一韻答之

鴻光趙管世同傾，似日中天似月明，萬里歸來無倦色，盡收天地有崢嶸。

落花 應愉社雅集潘新安命題

欲暖還寒日，江南草漸齊，天長懷道遠，霧重覺花低。片片隨煙舞，輕輕伴鳥啼。誰人深巷內，尚識護春泥。

清明前過鄉大家張丹故居意蘭畫舍同黃丈維瑁荆翁伉儷梁鏗齋潘小磐陳秉昌劉春草

山開古道比鄰居，獨有層樓別不如。一室早忘窗外事，百年惟賸世間書。三生悟徹神猶在，六法專精墨尚餘。料得北宮全孝友，載將彩筆住清虛。

爲鄉大家張丹遺作鸚鵡荔枝圖補題

羅浮山上幾題詩，何日根移此玉枝，慧鳥亦通蘇子意，京華富貴不須知。

又墨竹圖補題

揮毫信在洗池前，寫出迎風畧帶煙，莫笑此君誰得似，渭川千畝有同年。

又水墨晚林歸鳥圖補題

一枝千萬葉，一葉一菩提，葉葉枝枝外，眾生幾尚迷。

錦山文社二十周年社慶北潭涌渡假營春楔

十里輕車過北潭，又攜詩酒接重三。一流上下隨今昔，千載文章付笑談。山色怡情雖各異，鶯花游目總同耽。亭前細數忘年客，最羨公孫一族參。

譚伯平松竹神韻影集屬題

高標亮節兩堅貞，一狀龍蟠一鳳鳴，雪雪霜霜都歷盡，濤聲月影又承平。

次韻李文校齋贈楊怡

學海書樓文會宴席耆俊同座蜀郡才女楊怡偕婿翩然而止酒後以其書畫冊傳閱復撫古琴而奏皆雅韻天成一座爲之讚歎次日校齋鄉丈將美之以詩見示卽次韻呈正并柬楊怡

一彈頗效范成君，綺閣清聲繞紫雲，宿世若非王母侍，安能墨趣亦香氛。

李校齋鄉丈跌傷住院書此趨候

酒後琴聲尚隱聞，一箋飛示帶餘醺。方憐道上常傾蓋，豈意門前偶踏塵。宿有青牛供執策，自要扁鵲護慇懃。養傷深院焉非福，海角炎炎正火雲。

爲潘兆賢題采薇樓吟草集

樽前茗畔幾嚶鳴，讀畫言詩論氣平，多少春風秋雨夜，憑君健筆記陰晴。

蒲節前三日參與香港聯合交易所同人觀光印尼首途耶加達

幾點菖蒲雨，送吾往異鄉。此情何所似。小別已尋常。望望乘風遠，施施戴日長。矇矓方假寐，一覺榴槿香。

參觀耶加達證券交易所後

疆開萬島起南邦，坐享天然奏古腔，頗羨民間財亦聚，天堂自有金魚缸。

遊全印尼縮影公園

一日環行廿四州，全憑縮地有新猷，蘇門答臘方尋俗，又到婆羅探采油。

赴日惹途中

此間人物仿天驕，椰月蕉風暮暮朝。隱宅自多栽異卉，蠻娃幾許學新潮。江山儘覺忘賓主，回佛何由守律條。轉念唐街過未入，空憐當日老華僑。

日惹登世界七大奇景之一婆羅浮屠時值蒲節

歷劫微塵毀復存，層層梯石佛千尊，登臨偶值天中節，異域誰知有屈原。

峇里島別名神島寺廟林立中有海神廟屹立海涯莊嚴古樸爲遊客必過之勝境

茫茫神島匯潛翔，萬里雲連印度洋，海廟獨標群教列，爲他千載管波揚。

餘菴遊草屬題

信有遊鞭術，逢山便點頭。終南常入夢，異域幾登樓。雙袖攜雲處，一囊問俗謳。悠悠天地濶，歲月爲君留。

麥寶霖作鳳嶺風光圖屬題

五百年來幾替興，江山依舊日崢嶸。文章一貫登金榜，煙雨春深亦太平。冉冉鼇峰留夕照，堂堂蓮社接嚶鳴。憑君宿具生花筆，鳳嶺龍津倍有情。

陳慧女史港島設名家藝術中心課徒其中以授傷殘青年作畫見稱得才藝之母雅譽辛未之夏赴多倫多市展其作品以會彼邦僑彥盛事也書此壯之

才藝堂堂一母儀，既兼管煇復如醫，名家德業騰香海，將及他邦遠益馳。

陳天如鄉丈八二生朝小唱寄自澳洲次韻奉答

不管花前與酒前，信隨所遇付吟箋，天涯別有添籌屋，好夢家山月並圓。

秋霖

連宵頻滴瀝，暑氣未全消。似夢沉雲黑，如煙落葉飄。炎風猶颯颯，霜鬢倍蕭蕭。安得清涼夜，人無屋漏樵。

周朗山先生遺作詩畫展於廣州嶺南畫派紀念館先生爲道教前輩早年與其同道在粉嶺村創建蓬瀛仙館以昌玄學

道通天地有無名，一畫一詩盡物情，觀妙知微傳筆墨，留將萬載頌三清。

五柳書齋陶澂師生第四屆畫展於大會堂澂翁赴加拿大授藝未歸

筆淡田園韻，墨濃五柳陰，氤氳環四面，松下望雲深。

韋文甦齋伉儷自三藩市回會於陸羽茶室有詩見示次韻酬答并柬同座梁鏗齋潘餘菴陳秉昌譚錦沛江鳳儀

天涯難得喜翩聯，坐對茶邊當酒邊。笑語風前回往事，飽經世味倍隨緣。詩懷共許千秋遠，戶外方同夕照連。忽感葭飛雲漸冷，人間尚有幾堪憐。

爲太乙樓主劉少旅五十年前所藏劉一庵溪山高士圖

歷歷風塵鬢已斑，迷途終出到湖山。舉頭喜見松千尺，濯足任憑水一灣。得失渾忘紅葉落，從容坐待白雲還。茫茫宇宙無今昔，猿鶴應教許并閒。

題溥心畬繪松鶴招隱圖爲林樹錚

綠野遍清暉，松風引鶴歸，同期千歲壽，樂與世相違。

鄉丈潘潔夫自星回國經港小住同坐鑽石酒樓與荆翁伉儷羅竹坪梁鏗齋家叔惠潘餘菴陳秉昌潘幼剛羅鶴鳴等丈譽滿南洲在星建有叢桂書屋別業樹有移自故里丹桂二株堂前題有鄉先賢岑學呂遺墨是風雅士也平素熱心社會僑團公益今春乃其伉儷花燭重逢佳期將其兒孫輩備爲承慶之資星幣壹拾萬圓移贈當地廣惠肇醫院醫務福利之用以遂其先憂後樂焉。

歲暮相攜坐市樓，爲迎邠老說南洲。欣聞叢桂階前盛，益羨仁人天下憂。語及拙篇慚淺白，尚希尊聖在春秋。梅花正待君歸去，明日鄉關又壯遊。

墨韻琴聲館主伍彝生國畫展伍君有孔雀王雅譽

墨韻早滿三台，一堂又喜屏開。琴聲與揚異域，萬里載譽歸來。

香港福建書畫研究會第二屆會員作品展於香港大會堂

浩浩閩江日月長，流風南下氣益揚，生花妙筆先春發，四壁琳琅彩墨香。

近山堂主林湖奎國畫展林君於歲丙寅曾與劉少蓀黃文達辛鵬九顏小梅何麗生盧清遠龍展雲羅志強及余十人書畫應南韓東方文化研究院主辦展於漢城世宗文化館
一枝彩筆近山堂，時出銀鱗吐月光，有幸曾同高麗國，十人文藝起南方。

李福泉水墨蘭竹國畫展

千竿勁節，九畹幽香，不管何世，同凌雪霜。

閒居應楸社雅集高倬雲命題

高臥有多方，前賢幾獨善。放情丘壑間，抱節泥塗冕。詩酒百壺清，色空一笑遣。如何我小園，時感花深淺。

春意

壬申一九九二年

日色昏昕覺曉遲，宵來偶夢少年時。依稀重上文昌閣，隱約還溫幼學詩。此際乍忘身是客，天涯正恰燕歸期。故園草木欣欣意，起坐窗前語鳥知。

桂洲故宅巷口原有文昌閣早已毀稚年誦三本紅皮書爲三字經千字文幼學詩

壽李文本立八秩大慶

長民護世老猶龍，冉冉春光道益隆。源遠經留函谷日，時清詩紹大唐風。親仁德并容山重，介壽年方渭水同。遙企椿庭多樂事，芝蘭競秀鳥聲中。

爲李銳祖題紅船今侶詩書社藏冊

當年藝事話梨園，卅六名班各兩船。過省力爭西北上，下鄉旗向水雲穿。廣東鑼鼓源流遠，優孟衣冠世代傳。鑑古風今千載事，好將教化寄歌絃。

粵劇鼎盛期有三十六班昔時未有行車公路出演各地全賴水道藝人居食紅船

賀廣東南社研究會在廣州成立

八十年前起唱酬，風風雨雨幾同舟。花開花謝匆匆事，潮落潮生逐逐流。是劫是緣蘇衲侶，自南自北柳公儔。佗城宿盛行吟地，喜見羣賢接虎丘。

南社創於蘇州虎丘時宣統元年蘇曼殊柳亞子同屬該會先進曼殊曾剃度早卒

仲春回里重過雨花寺

有雨喜同甘露，無花不放晚晴，人來莫問先後，都聽鐘聲鳥聲。

答余綿生寄自多倫多元韻

迭展華章香滿樓，情同桃李互相投。月宮論藝原難再，友道如君亦罕儔。夙羨天倫多樂事，遙知楓國倍優游，閒來定有江山筆，神韻依然接九州。

八十年代彼此經常午茗於月宮酒樓友朋相敘多談書畫而已

順德詩詞學會成立賦賀

文筆相望十里松，由來吾土盛詩風。遠尋獨漉神如在，近考蒹葭禮並通。人傑地靈原不絕，花明柳暗有難同。喜看今日希前哲，賡韻分籌值世豐。

順德撤縣建市時維公元一九九二年三月廿六日按我邑建於明景泰三年即公元一四五二年距今剛五百四十年合九甲子也書此紀之

順天之道正悠悠，甲子循環方九周。歷歷桑田流汗土，青青燈火讀書樓。幾疑水盡山無路，又見雲開月滿洲。今日花林皆結果，鳳城兒女唱新謳

多雨爲瀾社課題

初夏暴雨連天山路幾告傾瀉通衢多成澤國人物傷亡爲百年來所罕見靜菴社丈適逢雨後自穗蒞港小集眾推命題丈即以此二字周示蓋感方過景象也又時有越南船民六萬餘人滯留本港難民營等待遣返原地多年來爲本港一沉重負擔與治安問題因而及之

漫言斯福地，難測是風雲。雨勢如傾海，雷聲若動軍。可憐寒士屋，差與越船群。誰解天原意，滂沱滌垢氛。

全球漢詩詩友聯盟第三屆年會時值端陽按首屆在曼谷二屆在台北今在本港舉行

大漢天聲氣浩然，氣求聲應步前賢。萬邦和協揚詩學，三屆聯盟盛酒邊。午日方飄蒲葉雨，龍舟正蕩鯉門煙，一堂冠蓋如雲集，萍水相逢盡謫仙。

小明星逝世五十周年祭星本名鄧曼薇三水人以擅唱王翁心帆所撰名曲馳譽南天惜不幸當年突暈厥穗市歌壇旋而玉隕香消時年僅三十而已今王翁年近期頤對此其有難忘者耶

花落星沉藝海時，五羊正被困蝦夷。事如流水誰還記，天妬紅顏孰令之。一曲秋墳聲杳杳，百年春夢日遲遲。黃泉若識今何世，白髮王郎尚故知。

採蓮愉社社長潘新安命題

憶我童年日，隨娘探外婆。外婆居地僻，隔岸種花多。偶覺因風起，微聞帶笑歌。尋聲香在水，有麗採蓮過。

劉悅笙人物國畫展

古道照顏色。春風入畫圖。若非生洛水，便是長姑蘇。束帶新陶令，扶筇老子都。閒閒隨筆意，神采出虛無。

次韻壽台北網溪詩社全球漢詩詩友聯盟同盟顏大豪伉儷七秩雙壽

日月齊輝暮暮朝，籌添鶴算福彌饒。真卿歷歷搏鵬翮，王母堂堂響鳳詔。蘭玉喜當春并秀，瑟琴長爲歲和調。允文允武光宗業，共仰勤勞在旰宵。

壽陳伯祺盟丈九秩生朝

丈有生朝自遣并記一九五六年曾出席北京國慶留有全體長照及多年來遍遊祖國河山參與海隅各詩社唱酬一一刊諸編集頌廬於今直系家屬凡六十一人云

九秩嵩齡并柏松，平生儒賈盛高風。琴棋詩酒春秋日，南北西東杖履中。裕後蕃枝方六一，光前繩武盡驂馳。當年況與京師禮，倩影長留歲歲同。

多倫多中華文化藝術界第四屆詩畫琴棋雅集

夏日炎炎眼倦開，雲箋忽自遠方來。欣知楓國多僑士，又仿蘭亭集硯台。詩畫琴棋賡四會，衣冠天地合三才。連年有負殷勤約，遙羨湖光亦快哉。

次韻并依建除體賀潘社盟蓮生友泉八十自壽

蓮社結香塵，生來有善因。友聲揚國粹，泉帖出家珍。八法融刀筆，十方抱道身。自多閒與樂，壽域享天真。

馬來西亞霹靂洞主持張英傑韻山昆仲詩書畫台北展屬題步示元韻答之

亦書亦畫亦詩豪，萬里榮歸志氣高。道貫乾坤昌易學，宗源龍虎隱雲濤。天南早廣三清境，台北今呈五色毫，難弟難兄真二妙，一堂馨逸滌煩撓。

陳棠鄉兄伉儷於壬申季夏自鄉蒞港爲其 令尊荆翁九秩壽慶祝擬接席之餘承詢會刊初期
有以龍山痴兒之筆名即其大作載在其中惜事隔四十餘年矣久而失落愧無報命又文旆回里後
迭寄示詩詞佳章歷歷等同史鈔豈尋常筆墨哉爲表敬佩書此奉酬

十八能詩豈是癡，當年憂樂夜燈知。有情天地逢辰日，細話桑麻及昔時。鳳嶺僑聲尋筆落，
龍山世德賴君持。鄉雲月色今依舊，料得秋光滿硯池。

贈關應良

海隅同作客，衣食各年年。亦是同閭里，相逢信宿緣。鄉序初接席，屈指春廿遷。羨君書城
擁，慚吾市井眠。君更多能者，六藝宗文宣。嘉山登聖堂，菁莪樂育肩。有教敦孝道，無類
廣經筵。因將親親大，推己及後賢。悠悠三十載，芸芸邁大專。絳帳有餘閒，八法深深研。
早事盧鼎公。棲毫到藝巔。漸詣鍾王室，還窺柳褚篇。由書齊入畫，抱道益乾乾。乃師梁伯
譽，衣鉢得真傳。左圖右書間，再再生雲煙。峰巒狀萬笏，勢逼龔半千。筆墨範四家，神追
沈石田。復行萬里路，襟袖拂幽燕。長城收鏡匣，五湖落吟鞭。南遊及星馬，異邦作散仙。
載筆歸來日，風華倍從前。歷歷展丹青，如張大自然。歷歷傳薪火，春風桃李天。歷歷傳薪
火，啓後以承先。

重陽前一日愉社同人雅集市樓衆卽以此命題

歲序如輪轉，寧知白髮長。方消三伏熱，正釀九秋涼。今夜一杯酒，同懷萬里鄉。臨風窮北
望，明日又重陽。

暮秋回里與同行遊釣倫敦鄭氏別業

十里橫塘一鏡開，悠悠天地出塵埃。隄環樹下皆芳草，版築籬邊幾釣臺。綠水因風疑洛笑，
黃花如夢似陶栽，垂竿忽起非常願，安得他朝結網來。

廣州市書法家協會順德李曲齋連登德慶梁錦英番禺李偉連縣陳作樑博羅姚永全六人曰
本福岡展回程過港以所攜作品陳列於油尖區文藝會觀後

中華文化揚夷島，萬里雲程載譽還。八法風神天地氣，六賢椽筆柳顏間，奇同科斗融今古，
矯若龍蛇鎮海山。萍水有緣逢勝會，一堂冠蓋仿仙班。

台北中國詩經研究會祝丘文莊海忠介二公生朝寄書徵詩

瓊山歷歷兩忠賢，功業光同日月邊。明道競追程子後，評言不讓比干前。居家更慎南陔戒，
得志尤爲天下先。古墓高坊靈氣在，民間香火盛年年。

家叔惠屬爲駱奕同中西交融水墨畫展

水是流雲墨是山，神來一筆一瀛寰，尋常紙上方三尺，橫起東西萬里間。

仲冬美加行首途航機上長日無聊與越僑老婦偶談

萍水煙雲盡宿緣，偶逢鄰座一孤鶩。與言始覺尋常遇，細聽方知屬幸全。國難曾逃倭患日，
家亡又渡越南船。倚天欲問蒼生事，造物何時絕霸權。

婦原籍廣西於抗日戰爭時逃越越內
戰後舉家偷渡來港旋以難民得移澳洲

羅省重過西湖村

板店烹茶與酒沽，蠻姬竟有比西湖。地靈冬日猶垂柳，風暖銀帆幻化鳧。天若有情長在笑，
花如解語欲相呼。異邦難得倫常樂，細對妻兒共引壺。

多城市樓會僑加文友

天涯長處約，珍重又登樓。相惜時光老，同忘富貴浮。霜枝任落葉，世事待從頭。浩浩安湖
水，如方讓唱酬。

多城北約農步

客裏隆冬賴熱腸，抗風冒雪步頑強。千千萬萬枝辭葉，戶戶家家瓦上霜。安得尋梅師孟浩，

空懷求鯉話王祥。臨深履薄前賢鑑，此地誰還念自鄉。

尼加拉瓜瀑布大雪中登瞭望高塔觸景有懷非洲索馬利亞饑民慘狀

雪飄萬里一升車，喜與兒孫若御虛。目極乾坤猶白玉，光爭日月落天渠。江山易地資同賞，憂樂於人本盡除。何事巨流遙遠外，人為涸轍困枯魚。

按索馬利亞自六十年代脫離列強統治以後內爭不息因而民生凋敝餓殍遍途

為美國紐約中華楹聯學會慶祝會長潘力生成應求八秩雙壽詩聯集題賀

夢裏鴛鴦五十年，終成眷屬有情天。一雙趙管來前世，無限詩聯遍大千。故國宮牆流德澤，異邦晨夕並神仙。杖朝今日欣伊始，遙祝鴻光壽永延。

按潘成二人少年同學湖南大學嘗訂白頭以戰亂失散近五十年始重會償宿願

家艾齡博士自美旋港駐九龍女青年會宿舍趨候時正在寫其平生回憶錄博士年方八九

屈指相逢兩載餘，重逢又在歲將除。君猶志壯身寧老，我亦心安命自居。立說著書同有願，守真養氣愧難如，當前縱尚紛紛事，互信人間愛未虛。

李文雲谷自穗寄示癸酉賀歲乙章次韻奉答文年方八八時公元一九九三年

春日喜雲情，臨風拜雅聲。仿沾金玉潤，還接杖藜輕。道在猶龍顯，時和化氣清。遙瞻函谷外，四野正天晴。

陳丈天如客臘自澳洲旋港小住瀕行以花好月圓相贈書此寄謝

夙羨先生擅畫龍，忽來雲外此詩翁。多年闊別情何似，一旦重逢眼欲朦，細聽異邦饒樂事，自慚暮齒抱殘中，聊將濁酒相祝贈，花好月圓歲歲同。

陳丈荆鴻歿於元春初六日書此悼念

春來老鶴忽回天，陣陣寒風冉冉煙，萬里清虛真羽化，人間痛失此詩仙。(詩)
歲方在酉始東風，幾戶雞聲入夢中，底事書雄呼不起，長眠竟與謝安同。(書)
一枝妙筆力千鈞，誰識斯文亦畫人，此去若逢溫菊叟，相憐不是牡丹身。(畫)

上元次日候陳丈伯祺頤養院丈方九一高齡時值雞年

猶龍偶爾倦雲遊，信是天公賦小休。不問雄雞爲甚唱，儼同老衲在潛修。何勞杖履尋芳草，自有燈花上雅樓。況又詩懷曾未減，春風月色滿牀頭。

梁翁海天自東官旋港同敘早茗後往候趙師少昂趙師梁翁師生同年皆歲方八九也

茗餘情未盡，徒步話浮潛。市虎方驚去，師門忽在瞻。漫妨疎立雪，且與近掀髯。片晌分居侍，天風動畫簾。

清明日晨步花墟公園

風似無聊雨似煙，木棉與我醉參天。心飛雲外重重遠，眼落花前楚楚憐。如此山川誰是主，回歸日月孰當肩。頻年搔首春來去，一度清明一惘然。

周千秋梁粲纓金婚

黔郡當時待凱旋，情天難得眷良緣。百年好合今方半，六籍同功早並全。兩極風光還載筆，九州花月滿歸船。海涯預祝長偕老，歲歲蘭階喜訊傳。

家叔惠屬爲其夫人梁絜廬繪九秋圖題十二韻

翩翩老少年，雁來紅滿天（雁來紅）。靈根移太液，如面玉闌前（木芙蓉）。漢宮秋光夜，袖薄舞踰躑（剪秋羅）。青雲如可步，更會月中仙（桂花）。朝陽原宿願，儀態極萬千（蜀葵）。風暖春睡足，曉妝帶露妍（秋海棠）。彷彿東籬畔，載酒倍陶然（菊花）。名齊五德相，紫冠足黃鈿（雞冠）。漫笑牆邊箕，粉蝶多流連（豆花）。如此好風光，盡占梅之先。如此生花筆，藝事真詣巔。展卷一再讀，深佩趙管賢。

鄉丈李棧贈其三十年前英倫講學入門弟子李國寶榮膺劍橋大學最高榮譽博士次韻以美之一箋宛自九霄來，喜報銀台出俊才，三十年前浮海日，亭亭玉樹賴公栽。

鄉丈黃維瑒欣園於客臘鄉丈陳荆鴻蘊廬於歲元春第六日潮安翁一鶴番禺汪宗衍孝博同於清明前後南海陳伯祺頴廬則於閏三月二十六日先後仙逝緬懷曠昔同深悼念

五老從來像謫仙，莫非有約返瑤天。方悲臘盡欣園遠，又起春愁老蘊眠。絕憶香江詩詠百，空餘潭水尺深千。錦山還別蘭亭長，悽信黃楊厄閏年。

翁一鶴遺著有香海百詠唐李白贈汪倫詩云桃花潭水深千尺不及汪倫送我情

劉春草伉儷偕兒女自馬來西亞回蔡伯勵爾雅喬梓爾雅自比利時言旋家迪幹自北美返同會市樓早茗後隨陳荆鴻夫人造訪嶺南藝苑喜晤趙師少昂樂而記之

歐美南洲各遠方，因緣難得會歸航。師門有幸同天地，世事都忘閱海桑。一杖清神松雪韻，滿簾逸氣隔山光。何時可又茶經後，學步重隨上畫堂。

蔡爾雅國畫展

爾雅乃曆學及堪輿學名家蔡伯勵鄉兄之哲嗣早年游學台灣從歐豪年習畫得天風之再傳後偕婦移居比利時藝事益進施化他邦今夏載譽歸來展於香港大會堂書此張之中外折衷承一脈，更同忠敬行蠻貊，悠悠萬里喜歸來，益羨天風流遠澤。

李文格書間坐乙首寄示次答

羊石非常日，惟君一扇香。君才真莫測，國步正難量。劫後重商隱，海隅羨鳥翔。披荆吾亦客，借酒潤詩腸。

世界二次大戰時君務商廣州與余隔鄰出入間相點頭及戰後又皆流寓香江彼此服賈之餘都喜文藝交游君更主持披荆文社多年有孟嘗風余曾濫字其間

勒流鎮建敬老康樂活動中心屬用建除體又以建設有愛晚城稱號因以城為韻

敬為禮本尚耆英，老者安之愛晚城。康體強神人並壽，樂天知命道長明。活生香色花開日，動靜嚶鳴鳥正聲。中夏文風源孝悌，心同汎愛溢鄉情。

文擢鄉兄於蒲節前以偶恙住醫院四日而歸自謂此生初嘗也有病興吟前後凡七十二韻另端午於伊麗沙白病牀上作乙律賜示次後者元韻寄候

薰風好夢采蓮船，正是東坡啖荔天。雅士當方明世業，稀齡何始結醫緣。前身信有降魔法，指日將逢不藥仙。鑪畔可曾觀本草，通神益氣聽鳴蟬。

按本草經曰荔枝通神益氣多食不傷人文擢每年祝東坡生日因引啖荔之說

謁黃大仙祠

羅馬天主教廷艾齡志樞機主教蒞港作宗教交流到粵色園訪問款待席前余以孔教學院之成員附末座得與此會並暢遊之機緣按該園始創於公元一九二一年與余同一生年也

赤松仙氣洞天開，瑤卉瓊枝遍地栽。無法不通三教立，有緣還接萬邦來。能諧族異當爲喜，總覺人間尚可哀。笑我浮生同歲月，匆匆今始問消災。

大暑後六日隨鄉丈湯國華父子公孫應香港中文大學中國文化研究所所長陳方正杜祖貽教授之約參觀該大學主辦之順德黎二樵南海謝蘭生書畫展覽後

八法風神宛六朝，一堂水秀萬山嬌。源流有自宗靈運，詩意無聲認二樵。似踏春來青草地，同留晚照綠楊橋。仰觀俯察低徊甚，鬢髮人間戾盡消。

立秋日與杜祖貽何文匯陳方正應湯丈國華登荃灣圓玄學院招以素筵

沐日松風界，玄都喜共登。三清尊太上，一貫仰多能。道滿藏經閣，功同不滅燈。好生天地德，蒲饌亦香騰。

院內建有三教大殿奉祀儒釋道三聖圖書室存有古籍四萬餘卷附設有護理安老院講道堂齋堂等另在港九新界各地開辦有中小學幼稚園多間行道化教育

候容丈漱石於東華東院同陳師母思敏潘餘菴陳明眞

年年人愛荔枝紅，今夏蟬聲略不同。是否海隅多苦雨，因而藝苑受狂風。毫端偶失揚塵外，醫室方如入定中。料得秋涼天氣好，藥爐只對煉丹童。

丈爲天風七大弟子之一平生以擅寫荔枝稱譽當世畫壇因開句及之也

廣州書畫研究院成立連登鄉兄榮任院長遠承東召弗克應約寄此代謝並賀

書畫同源始伏羲，圖成八卦啓玄機。星辰日月觀天象，鳥獸蟲魚造字時。秦漢早頒諷籀學，溪山夙譽無聲詩，精神正向文明展，繼往開來合舉旗。

題陳丈荆鴻遺著藝文叢稿及海桑憶語

龍山一大老，窮經到髮皓。鼇海五十年，申申青毡坐。少日南北走，崢嶸知名早。中歲東西遊，逍遙及群島。友朋天下士，硯田傳薪火。家學光錦巖，文章當載道。國故揚風雅，中外同傾倒。陵谷弔古今，離亂傷劫禍。海桑詳憶語，秉筆無偏頗。言若及民生，崇儉貴粟稻。論及富與貴，矜驕說因果。餘事猶史乘，一一明襟抱。或以溫柔顯，敦厚善頌禱。或以紀苔岑，盡網溪山好。法乳通先賢，更爲驚舉座。筆陣亦多能，竹帛雄章草。丹青復高潔，閒來揮蘭藻。藝文積五車，千秋留叢稿。潛德發幽光，足爲世之寶。斯人今遠矣，英靈長浩浩。斯文垂不朽，名山應永保。他時考文獻，不異公穀左。

順德市書法家協會爲賴際雲屬題

逸興筆千鈞，淋漓墨雨雲。縱橫呈鳥跡，錯落隱魚文。意遠尋倉頡，神清仿右軍。飄然羅萬象，雅會喜同群。

題李文本立綠榕吟草詩集

流風宗白也，佳日采東籬。鳳嶺脩闕廟，青雲拜仲尼。春秋過燕雁，冰雪照鬚眉。立禮興詩學，依然樂不疲。

鳳嶺在順德城之西因又稱西山以闕羽廟建於山下故稱西山廟近年文昌議重脩之又城內大成殿日久已毀於兵火又昌議重建於青雲園之內復其舊制

家叔惠幼惠昆仲書法展覽

眉山軼轍，洛邑機雲。難兄難弟，千載揚芬。今我二山，金友玉昆。棠棣競秀，彷彿同群。源流水部，藝擅魚文。簪纓世代，硯耕筆耘。承先啓後，桃李繽紛。法度鍾繇，瀟灑右軍。尺縑寸幅，連璧同珍。香傳丹桂，游藝依仁。

徐悲鴻先生傳人駱拓畫家展覽顏曰馬的世界

墨妙筆精淡亦濃，神來寫出馬如龍，飛騰有日馳千里，冀北真同伯樂逢。

中秋後二日與香港中國美術會同饒別何敏公主席移居美洲用李白送友人韻賦贈

秋風涼大地，明月滿香城。勸酒三分醉，送君萬里征。行雲流水意，折柳奏驪情。夙仰弘忠敬，天涯更善鳴。

重過故里白蓮池觀音堂

按此建置於南宋年間余稚齡嘗隨母氏參拜其一年一度嘉會世稱生菜會者以時勢遷移一度廢置近又復舊觀矣今歲秋回里偶隨里人引領過此距前忽忽六十年矣回憶當年此廟位在容桂一郊野山麓之間荒煙處處今則成爲工商民居林立之區宛猶兩個世界也

勝地重來憶小時，隨娘曾拜白蓮池。花香葉碧猶當日，地覆天翻豈預期。尚喜靈威羅漢在，未忘福祉庶民施。徘徊欲訪鄉耆舊，一問滄桑孰主持。

澳門中華詩詞學會主辦全球漢詩詩友聯盟第四屆年會

載酒濠江會，松山徑菊香。天聲賡四度，寰宇接重陽。遣得浮生樂，何妨急就章。連宵盃盤畔，同待月微涼。

辛鵬九寫蔬果圖屬題

清蔬珍果四時新，種自山家不染塵，咬得根香真美味，隨緣隨地一高人。

又菩提子

晶瑩串串像禪珠，名亦菩提與世俱，萬物皆從天化育，祇園種得更真如。

又葡萄小鳥

千載相傳西域來，纍纍始自漢宮栽，珠璣寶顆風前熟，惹得靈禽口笑開。

又金魚

大地春回正煖風，金鱗三尺綠波中，此間亦有濠梁意，今古莊生一道同。

辛鵬九女弟張麗友寫椰壳植蘭圖觀後題之

無地如何可託根，花間別有一乾坤，幾生修行靈空谷，證得清香不著痕。

鴻社同人重陽雅集龍城鹿苑酒樓喜值黃經偉自揚州來劉佩蕙歸自舊金山

一年容易又深秋，難得西風任去留。載酒題糕仍往意，迎鴻送燕亦從頭。有朋況自揚州至，話舊還聽北美遊。百代光陰皆過客，且邀新月共登樓。

鄉士羅冠樵人物國畫展

彩筆一枝造化同，當風出水宛神工，江天秋色高樓上，彷彿人間與畫融。

立冬日與順德聯誼總會同人一行二十八衆泛馬祝賀觀光團拜訪檳城太平霹靂吉隆坡森美

蘭暨沙巴六會館呂彥首途作於機上

風前彈指又初冬，冉冉流光水萬重。抬眼方觀紅日近，回頭忽見白雲封。如何天地能長久，卻甚人間有不容。五度南飛情未老，殷殷所望在相逢。

檳城赴太平途中

一橋橫北海，兩岸遍鄉情。流水深千尺，人生歷幾程。僑賢遺手澤，娘惹隱歌聲。百載閒閒過，他邦亦太平。

怡保霹靂洞

飛車又向上方尋，結伴重過小桂林。福地洞開蘆笛意，靈光晚照象山陰。行行有話沾禪學，處處留題認道箴。三日三參三教殿，欣知護法世同心。

怡保多山丘有似象鼻山者因有小桂林雅號三參指與檳城極樂寺雷州三寶洞

沙巴亞庇與山打根所見

編茅築版海邊居，世世生涯習捕魚。幾輩英雄鋤烈日，誰家兒女望鄉書。漫山蒼鬱材勝用，異族和諧力有餘。選勝探幽還問俗，匆匆道上每迴車。

山打根觀西必洛人猿中心後

多族生羣島，人猿最獨閒。傳云同一類，只爲世深山。謀食不謀道，厚皮更厚顏。森林天地窄，風雨作門關。

贈司徒乃鏘乃鍾昆仲

東臬堂下茁孫枝，六法專精耀夏夷，自是世傳春睡學，蒼城微笑聽堽荒。

仲冬之日兒孫多人自海外回同祝余二老結纜五十周年家慶酒闌書此語內

風雨晦明秋又秋。青春長願與卿留。每懷當日稱龍鳳，孰料餘生尚馬牛。所幸室家堪處樂，未因兒女築窮愁。百年今夕途方半，甘苦不辭到白頭。

饒歲是年雙春閏月與昌社同人

臘鼓頻催夜，雞年報二春。悠然興北望，隱約辨南巡。人老詩彌健，時和酒亦醇。寒梅花已著，歸夢倍津津。

歲暮過陳村

花似海潮果似山，香盈兩袖過鄉關。方憐秀色疑西子，又賞濃裝像玉環。自是含苞皆笑口，因而到處盡開顏，煙紅霧綠新風路，車水馬龍任往還。

甲戌賀歲和李雲谷丈韻寄自穗垣復以之應順德市容奇詩社徵詩公元一九九四年

燈火連宵鬧不休，一年好景又從頭。賣花人擅誇生意，經世吾慚乏善謀。所願無驚雞與犬，未妨姑任馬和牛。春回自有尋芳地，斗酒篇詩會唱酬。

新雨爲龍城鹿苑酒家周末早茗雅座梁鏗齋命題時歲初三

細雨霏微澹蕩風，雲山遙望有無中。草因似我鬚初白，花若含羞靨渾紅。如此春陰將甚意，漸成膏澤兆年豐。濛濛十里呈新象，真信天心父母同。

乾隆甲戌（一七五四年）脂硯齋重評石頭記略讀後

石頭記本名紅樓夢又名風月寶鑑此書乃三十三年前胡適出其舊鈔藏本由台北中央印刷製
廠出版僅一千五百套（兩冊）流傳輾轉當甚罕逢今得文字之交中山孔超卓先生自馬來

西亞託其過港之友見賜乃略讀之後以此書珍貴而又歲遇甲戌天緣巧合不宜據爲己有因
轉贈順德市大良梁鈺琚圖書館寶藏以供衆覽方不負孔先生之美意也時孔先生九十二歲
四回甲戌一奇書，千里頒來拱璧如。展誦緣隨春與始，因憐世有恨難除。石頭託說蜉蝣事，
寶鑑空留日月居。是夢是真真亦夢，長教後至辨盈虛。

歲初十日應蒼城畫會同人雅集少者二十人長者有八四叟蘇錫文八二叟羅竹坪陳荆鴻夫人
潘思敏女士席間喜聞其師奇翁今夏將自雲高華回港赴穗畫展

少長欣咸集，一堂慶歲新。酒香齊益壽，花好正宜人。燈影窗前畫，儒風席上珍。聞師今夏
返，杖履快同親。

壽趙師少昂九秩大慶

趙壁連城天下傳，風宗孟頫世彌尊。嶺南一脈騰中外，甌北三多裕子孫。喜值山河齊上壽，
不殊桃李會芳園。群賢畢集春光好，柏酒同斟聽鳥喧。

順德何氏六人書畫第二屆展覽於香港中區大會堂同叔惠幼惠迪幹麗生鳳蓮

十載重來一甲周，喜逢春日會高樓。風光正恰猶花展，聲氣還同爲道謀。翰墨因緣從古意，
文章爾雅讓朋俦。他年更願聯三度，長誦嚶嚶伐木求。《展出日期乃是歲三月七日至十日》

澳洲順德聯誼會成立代鄉序作賀

欣逢建市二周年，先播鄉音萬里天。宿昔自多忠信業，於今齊誦敬恭篇。桑麻共話騰騰日，
聲氣同相濟濟賢，遙祝宏基方始奠，大洋洲上慶延綿。

按三月二十六日爲順德慶祝建市二周
年之期而該會早七日成立

雲林堂吳祖蔭師生畫展

雲深宛共在山中，林木參天造化同，堂外騰騰摩詰意，堂前桃李正春風。

龍山金紫峰觀音閣十三殿重建落成開幕應邀回里參與其盛時維公元一九九四年三月一日
十三殿爲觀音閣爲文帝殿爲武帝殿爲北帝殿爲魁星殿爲三元大帝殿爲醫靈大帝殿爲天妃殿爲財神殿爲金花惠福夫人殿爲送生司馬殿爲地藏王殿爲土地廟齊建在金紫峰山麓
高三百餘級

拾級而登眼頓揚，十三古殿喜重張，仰天莫問誰無愧，此日同來但進香。

訪龍山陳荆鴻先生故居應先生之哲嗣棠

春日登堂忽憮然，去年方恨別人天，庭階猶滿書香氣，無限低徊玉樹前。

途過龍江鎮與同行鄉士鄧又同羅冠樵所見

勒流過後又龍江，古塔一尊戶萬幢，極目正開新氣象，同欣富庶遍鄉邦。

春仲與內偕三兒及孫輩登太平山徒步環行山頂小徑廬吉道歸而記此

百丈高山一扯旗，升升降降到何期。危闌繞棧仍前貌，高廈排雲倍昔時。環步卻難逢舊識，俯崖惟見茁新枝。獅峰北望誰高下，日正中天緩緩移。

清明前一日參大嶼山寶蓮禪寺天壇大佛並省先慈黎太夫人外姑楊太夫人靈灰龕

木魚峰上立，從眾禮如來。俯首思親遠，憑闌念劫埃。諸天方日耀，何處遍蓮栽。片晌過香積，風前半樂哀。

宜亭憶舊步念因詞丈寄元韻

春綠江南處處茵，如何佛說是微塵。一亭依舊臨流水，滿目溫馨認墨痕。俯仰若能隨事異，唱酬猶得以仁親。有花有酒清明節，天許中郎會雅人。

對酒爲愉社雅集課題

一石誰能醉，希前以解憂。坐花吟月下，橫槩賦江流。赤壁攜魚夜，東籬采菊秋。若猶今視昔，隨遇亦深甌。

題鏤齋賞梅贈同行譚錦沛詩卷譚君擅攝影術

獵影獵詩兩大家，江南江北御流霞。一囊機杼觀天象，十里香風醉墨華。極目真堪憑雪海，誰人曾欲泛仙槎。羨君并富留春韻，滿紙精神頌國花。

文擢違和久未命駕翠悅茗樓敘話因與叔惠幼惠昆仲同往候并貽此句

夏日炎炎驟雨時，燕居難得只哦詩。沙田風月神何似，翠悅朋儕念每馳。幾許雲深宜采藥，未妨鼎畔仿修持。故園消息荷香至。將接東坡話荔枝。

聞阿刺伯首都麥加發生因朝聖擲石驅魔在人潮迴避中互相踐踏至死者數以百計又此回教

國家頻年閱牆禍起陷生民於萬劫邊沿者賦此哀之

朝聖原求不壞身，如何一拜竟歸真。驅魔底事爭投石，護世該當重化民。似此無辜誰作俑，若云有命孰爲因。可憐手執蘭經者，頻歲還蒙蹟武塵。

香港文化中心聽粵曲匯唱廣東譜子演奏會後

熱浪沈雲鬧市中，悠然忽似坐蟾宮。歌聲起落疑仙子，舞袖踰躓象蝶叢。粵譜搖鈴仍餓馬，星空壓座卻驚鴻。曲終自與人俱散，世事從來一轉空。

又一村學校創校校長鄭守仁九秩壽慶步湖楓詩社社長陳浪平賀詩元韻寄加國多城鄭校長

爲國立中山大學首屆畢業生與建校委員會主席古公卓甫友善因乃屈就後移居加國

一村曾共處南陬，一校初開賴碩籌。樹木樹人懷往事，無賓無主話從頭。詩書傳得天行健，歲月能閒鶴與儔。遙望湖山安大畧。壽長仁者水長流。

壽李超哉八秩晉八華誕次韻寄臺北市

世系伯陽早著鞭，文章道德湧如泉。江山萬里平生志。琴瑟長春內助賢。美酒何須需百斗。好詩亦不定千篇。辰逢八八乾坤象，指日榮歸樂晚年。

蒲節前司徒奇畫伯自雲城回穗與黎雄才關山月作春睡三傳人聯展過港時蒼城畫會同門招

飲豪苑酒家筵開四席亦一時之盛也書以記之

蟬鳴妃子笑，菡萏漸生香。杖履遵時至。

歲首蒼城畫會春宴時余贈以詩有句云聞師今夏返杖履快同親

荆關并氣揚。一堂春

睡意，斗酒夜光觴。明日佗城展，紅棉定最強。

春睡三傳人司徒年最老故云

是歲仲夏豪雨兼旬西北江汜濫引至水淹廣東廣西福建湖南江西浙江六省部份地區按華僑

日報六月廿一報載此一災情有四百卅八人喪生六千餘人受傷四千八百萬人生活受影響

情天正待笑顏開，孰料波臣一怒來。西北兩江洶湧湧，東南六省遍哀哀。幾淪澤國呼援手，復使民生陷極垓。忽念前回年乙卯，誰同魚鼈又當災。

珠江隄畔白天鵝賓館同諸甥男女午座時方洪潮高漲漫漶沿江大道低窪地帶更水深沒脛

珠海雲山不厭看，忽驚洪患漫江干。儘教暑氣心俱熱，總念災黎意頓寒。敢怨蒼天忘翼世，任從暴雨長狂瀾。諸甥難得同肝膽，茗畔沈吟坐不安。

爾綠爲愉社雅集饌中有青蔬一碟鏤齋詞丈卽此景命題

綠蠹尋常醉，誰曾嚼綠筵。原來郊外色，不讓水中鮮。根固傳香味，葉還賽璧妍。何時重舉筯，學佛席之前。

美國主辦第十五屆世界盃足球大賽總決賽觀後

四年一角逐，匝月戰連場。場場龍虎鬥，弱者早還鄉。愈戰愈勇者，纔得進四強，四強爭位置，陣上幾帶傷。復在爭冠亞，狀更像盤腸。座觀十萬眾，聲達七洲洋。我本非球迷，瑩屏

亦夜張。記憶八年前，小孫曾與評短長。光陰如流水，孫兒今已他邦望上庠。宵深我獨坐。窗前燈下幸微涼。看得入神時，忘卻兩鬢霜。尋思歷屆英雄榜，幾人名尚香。此賽原重技。勝負亦平常。後浪推前浪，古語實已詳。代有高人出，勇有士無雙。畢竟友誼是第一，四載重來笛又揚。

美加第十三行

羅城南瓜園哥爾夫球場晨步偕內

平原一望綠油油，十里縱橫幾度秋。偶立坡斜疑浪捲，微沾花氣幻仙留。排雲古木參天出。浴日鳴泉裂地流。如此風光誰管領，能將一棒冠全球。

與雲城親友宴後遊女皇公園值雙星節夜

酒闌聯俊侶，花下步良宵，天上一彎月，人間幾鵲橋。香風撩過客，燈影惹思潮。總羨居夷者，閒來樂夕朝。

雲城中華文化中心觀司徒奇翁國畫展後

春睡三者英，方同放晚晴。一番喧穗市，今自展雲城。集大皆精作，圍觀起共鳴。天涯欣此遇，真不負生平。

偕內與齊兒文禮孫郭正謙外孫從多城赴紐約途中

千島山重重，一車向美東。客途涼有信，倦目望無窮。只羨蒼生業，渾忘蠻貊風。遲遲方抵步，月待異鄉中。此程途經千島湖一路有山有水是日辰時出發至酉戌之間始抵紐約外城一宿後次日方進城中心

拜會美東南海順德同鄉會喜晤諸僑賢

十五年前奉約來，登堂又值百花開。鄉情洋溢猶歸去，風雨霏微亦快哉。兩邑相承原一脈，萬邦和協仗三才。東都燈火如春夜，杯酒言歡得月臺。是晚剛逢中元節夜蒙假座華埠一酒家款待

美國自由神像遊觀後

二百年來世幾新，一尊巨像獨凌雲。笑他火炬空揮手，滿肚機心像內有梯可登至頂盡掩裙。多少游人能鼓勇，春秋佳日效參軍。重來我亦登高客，冠頂窗窺兩岸分。

遊咸美頓皇家植物公園

咸市清平遍綠區，一車彷彿過仙居。花香縷縷和風日，草色青青細雨餘。仄徑通幽頻遇豔，日值周末有不少新人於婚禮之後到此拍攝儂影澄湖漫步又觀魚。松林楓影鳴天籟，似笑遊人不我如。

加拿大國家展覽館演出中古武士比武觀後

展館忽開古戰場，刀光劍影丈矛長。飄揚旗幟陰風起，明滅燈光夜氣強。羌笛一聲驚四座，英雄幾路躍龍驤。身披戎服雖優孟，多少閨人感斷腸。

賀加拿大中國書法協會成立鄺諤林環陔馬國權分任正副會長

海外傳倉頡，文風光夏夷。縱橫張筆陣，俯仰則天儀。法比衣冠正，神揚顏柳姿。同心維國粹，愈遠愈扶持。

謝王亭之素食主人

羨君安定靜，隨遇圖麟都。經卷三千界，花間一茗壺。天涯行篤敬，香積述前謨。願此欣欣業，長開壽世圖。主人談錫永嘗謂其素食食譜傳自其庶祖母盧太夫人及其老僕瑞婆云素食館內壁上懸有不少主人珍藏之佛像畫及時人書畫頗別有境界

多城華埠國際城酒樓會中加文化交流會長老周慕成

時方九十四歲

廣東同鄉會會長林環陔加拿

大中國書法協會會長鄺諤安省中國美術會會長勞允澍多倫多湖楓詩社社長陳浪平暨僑

加多位耆彥共三十餘人

稜稜楓影玉湖天，一會樓頭隔幾年。燈火撩人宜買醉，蒼穹厚我爲開筵。最難秋月清風夜，得拜耆英大雅前。異日有緣重話舊，願於香海接羣賢。

洛杉磯華埠富臨酒家會晚芳詩社梅花詩社中華詩會南加州華人美術學會暨羅省中華會館諸僑彥冠蓋裙履四十人是晚值八月初三日節逢白露

客中秋露白，夢裏桂枝香。昨飲安湖水，今飛洛社觴。悠悠天地闊，歷歷友聲揚。一見皆如故，未因隔遠洋。

客寓晨坐遙視鄰居有感

客裏一壺茶，晨興獨對花。茫茫天待旦，冉冉日將華。幾輩猶酣夢，他邦且作家。誰憐此游子，識否話桑麻。

示僑外諸兒孫輩

天涯萬里爲含飴，此際翻思我少時。去日焉知今日事，從來一任既來之。雖孫頻起牙牙語，老伴彌添展展眉。生在異邦前路遠，不忘所自總相期。

杜教授祖貽自美利堅返設宴香港中文大學招飲

夕照沙田宿雨收，嵐光花影入書樓。主人本是宗詩聖，先德還承鑄酒籌。今夜羣賢多舊識，明朝大地又中秋。相逢莫問如萍會，且舉壺觴共解憂。

鄉士劉春草自馬來西亞回展於香港中區大會堂賦賀

去歲南洲共酒盃，今天喜接帶春回。筆精墨妙名揚遠，嶺北年年讓著梅。

爲李國明寫山水長卷題

一山又一山，萬里任登攀，中有高人宅，臨流戶不關。

鏗齋喬梓招飲鑽石酒家同饒宗頤羅忼烈陳秉昌李瀉烈周錫韞等

宛會芳園值小春，興懷不讓敘天倫。既叨北海同添壽，益近儒林若飲醇。話舊正宜乘一醉，談玄尤賴過三巡。停杯欲問鄉消息，指日梅花夾古津。

越秀文藝主編詩人梁儼然來書索句賦此贈之

白雲探勝

白雲山探勝一書乃梁君主編

數春秋，歷歷憑君大筆收。仿續南園宗有譽，

明嘉靖年間順德梁有譽曾發起組詩社繼起南園

還尋仙跡溯浮邱。

世傳周靈王時代有二仙一曰浮邱公一曰浮邱叔乃在嵩山得道之後南來羅浮白雲二山之間常顯靈異

文風起競摩星嶺聯句光

爭鎮海樓。天許有緣容一面，何時枉駕又香洲。

梁君曾於去歲來遊香江得郭魂之介來會鑽石酒樓

餘生應洛杉磯晚芳詩社第一百二十四期命題

八年離亂日，半紀背鄉時。往事匆匆去，迷途漸漸知。只慚斯室陋，未敢此天欺。風雨尋常過，閒來且讀詩。

中山市小欖鎮第四屆菊花大會偕內與何氏宗親總會聯合香港盆栽藝術會同人一行五十衆應欖鎮歸國華僑聯合會前任主席何仰鎬宗長相邀乃欣逢其盛成詩八首

五千花朵一株開，七十萬盆百姓栽。四屆嘉辰逢世泰，八方逸士賦詩來。香山餘韻追陶令，水部流風拜石臺。地利天時人亦壽，一樽同頌此三才。

又

亦紫亦黃月白時，如羞如笑傲霜枝。枝枝吐豔香宜酒，葉葉撩人意可詩。視昔視今皆逸氣，儀龍儀鳳幻仙姿。金風玉露銀燈下，戶戶壺觴結彩旗。

贈大會步前屆徵詩鄉先賢溫肅太史以對菊有懷陶靖節爲題榮膺冠軍元韻

鬢與黃花漸染霜，匆匆早又送重陽。年逢甲戌興曾歷，夜課兒孫愧未遑。開卷偶然窺上古，補天姑信有媧皇。東籬載酒真同願，到老心尤愛晚香。

附錄學海書樓主講翰林文鈔所載溫肅太史原作

一夕西風兩鬢霜，籬花每發憶潯陽。雲停八表昏同慨，桑種三年採未遑。自是無心知魏晉，只應有夢寄羲皇。微瑕白璧誰能議，人世惟爭晚節香。

菊花大會一連十五天開幕日(十一月十九日)夏曆十月十七日(晚放煙花助慶

繽紛煙火起花叢，十里城開不夜中，如電如虹人盡望，笑吾心尚少年同。

在展區小丘中仰鎬宗丈引謁南宋始遷祖何氏九郎(純儉)十郎(敬讓)兄弟合墓遺址

溯本尋源認始遷，菊城今拜兩先賢，風香花影人叢外，聽說當年盡祖田。

仰鎬宗丈以景德鎮特爲大會紀慶精工所造彩瓷花盆圖文並茂內紀四屆年曆一對贈何

氏宗親總會一對贈耀光宗丈一對贈余

景德名瓷世所珍，鴻文汎泐紀嘉辰，高情重比殷周鼎，千載憑將敬族親。

拙繪菊花並題小詩奉謝宗丈仰鎬欸待

六十周年一盛開，芸芸幾許喜重來，君家自有香留節，世世子孫手澤栽。

觀後有感步鄉先輩師尚老人岑學呂先生山外集之怡廬初菊元韻乃抗日戰爭時先生流離

於湘省耒陽縣之作

遊侶誰誇今又來，能云花爲故人開。縱嫌倚傍無修竹，未覺清香讓早梅。生不同時原宿分，會逢佳日且徘徊。因思凡事緣前定，莫待秋風始細裁。

附師尚老人原作

涼風吹過野塘來，漸覺秋花著意開。頗似老夫甘寂寞，正宜爲汝一徘徊。酬茲佳日偏無酒，生不同時豈獨梅。此地初逢人亦淡，未須重問是誰栽。

彭蕙清女史書畫展於香港中區大會堂女史學山水於白雲堂黃君璧學花鳥於趙少昂二大師

一池彩墨美中華，萬水千山泛百槎，陣陣香風來繡閣，白雲意境嶺南花。

墨韻琴聲館主伍彞生楓國歸來展於金鐘太古廣場光華文化中心

墨韻早流香，琴聲遠益揚，長天千萬里，來去任翱翔。

輓叢桂書屋主人潘潔夫鄉丈歿於星洲丈乃星洲順德會館元老

一別三年記尚新，忽驚南國喪斯文。獅城此日悲流水，鳳嶺從茲悵暮雲。萬里鄉情垂後至，滿園叢桂接先芬。餐英雅韻應傳世，一卷禪經並覺群。

丈昔藏有岑學呂先生手書阿彌陀經黃維瑞丈題有壽世覺群四字於卷末

鳴社詩詞諸彥爲師尊蘇文擢鄉丈舉行書法展於中國文化協會

書道亦師道，彌欽化雨深。六年鳴社課，一卷大良吟。咳唾皆珠玉，流傳賴墨金。進張相益學，珍重會儒林。

癸酉六月文擢僑曾借鳴社詩侶及其眷屬師生多人遊於大良輯有大良吟草以紀遊興

陳樹人先生書畫展於九龍培藝中心觀後時甲戌歲暮

居派出高陳。難分孰仲昆。遺縑皆畫史，隻字亦詩魂。當日鳴琴地，隨風泚墨痕。一花一木石，彷彿滿乾坤。

華僑日報停刊有感因余自丙戌由澳遷港四十九年以來未嘗一日輟看之刊物也按該報前身名中外新報是創刊於清咸豐八年公曆一八五八年至一九一九年易名爲華商總會報再至一九二五年六月五日起由岑維休先生接辦正名爲華僑日報以此計之迄今已有七十年歷史今一旦以經營困難突於一九九五年一月十三日起停刊最後之編號爲二四三五八號蓋在日陷時期曾輟刊一段日子也今以頓感若失良朋益友慨然賦此

我與華僑若弟昆，半生風雨共晴曛。論年我長他多歲，並日他將我博聞。一旦如何俱物卷，明朝有感受秦焚。低徊忽悟循環理，合久由來不免分。

公元一九九五年一月十七日黎明時分日本西部地區神戶與大阪發生半世紀來之災難性大地震死亡逾五千人震區仿同廢墟無家可歸者數十萬人誠浩劫也感而賦此

當年作孽尚誰知，

按日本自甲午一八九四年佔我臺灣一九三一年佔我東三省及七七全面侵略

是否天懲未已時。殃及關西當甚怖，

禍延廣島若重施。山崩地裂疑神怒，鳥絕風悲象鬼移。爲甚人間仍莫惕，頻頻躑武互凌欺。

乙亥立春日晨過花墟公園喜見游人以餌飼鳥鵲羣飛來爭食忽結隊盤旋飛舞狀甚得意余亦欣然因而記此

一角花墟遠近香，獅峰林下接鼈洋。悠悠天地迎春日，逐逐飛鳴覓食場。忽見啄餘舒倦翅，齊乘風勢繞中央。和平若可憑斯望，雪羽銀翎願永翔。

十二生肖詠按六朝沈炯宋黃山谷明胡儼元劉因曾有此作

漫管老鼠落天秤，且談牛女會雙星。如虎添翼真何猛，守株待兔別有情。點穴尋龍姑與信，畫蛇添足似不應。跑馬看花隨所遇，亡羊補牢總善營。勝地猴王容立廟，通時母雞亦能鳴。慎勿趕狗入窮巷，還防扮豬詐無聲。

洛城晚芳詩社前任社長黃宗晃爲多城晚晴詩社詩課命題曰心聲屬和元韻分呈

楓葉掠人鳥有聲，晚來佳氣半陰晴。天開圖畫三分月，雲集安湖萬國旌。良夜何如同一醉，異邦難得共長鳴。分籌賡韻無虛座，流水高山並有情。

贈樵山馬次航鄉媛周淑韶伉儷

游藝依仁絳帳風，源流遠接伏波雄，筆參造化齊莊敬，趙管才華日月同。

題溥心畬西山逸士墨妙圖爲蘇丈錫文

亦仙亦佛亦儒風，揮灑如如造化同，秋滿江天樓閣外，一山一樹一神工。

又題溥心畬遺墨爲蘇丈錫文已題卷首爲馮康侯已題詠者有陳荆鴻郎靜山黃君璧梁寒操

劉太希葉公超馬壽華陳子和區季謀蘇文擢黎心齋何叔惠歐豪年潘重規匡仲英朱玖瑩等

西山逸氣一龍蟠，八法風神極大觀，諸彥品題添錦上，百花齊放會衣冠。

題于右任禮運大同篇爲蘇丈錫文

五千年歷史文化，十億人齊望國家，意在其先于老筆，墨香豈止美中華。

題楊善深春江歸漁圖長卷爲蘇丈錫文

斜照落橋西，漁舟唱晚歸。江山無限意，明日又朝暉。

岑丈飛龍年方九一以夜未成眠偶得一截見示次韻奉答

自笑閒來墨亂塗，敲詩每更覺腸枯，平生只樂從吾好，未敢燈前認老夫。

齊白石芙蓉雙蝦圖觀後呈謝鍾石泉按此圖作於一九一五年歲乙卯

枝枝如面又長鬚，氣韻天然信筆模，八十年來猶此日，展看同認借山圖。

香港中國美術會第二屆春楔上巳雅集雲泉仙館

佳節又逢上巳，天涯方沐甘澍。錦山往日高歌，仙館茲辰小駐。視昔視今休論，有花有酒隨遇。江山一例多嬌，正釀無窮妙句。

順德詩詞學會三周年賦賀

言志尋章共樂天，欣逢建市並三年。溫柔敦厚弘詩教，安定繁榮賴眾肩。自是有聲能寡怨，長流餘韻盡光前。鄉園遙望知何似，荔雨荷風近滿箋。

題鄉丈蘊廬遺著手書獨漉詩箋

大序爲商作，毛詩賴鄭箋。天不生斯文，將安啓後賢。維我蘊廬公，恭敬同此肩。堂堂光先烈，赫赫表遺篇。洋洋百萬字，歷歷三百年。引吭希燕市，採薇歌北田。是氣所磅礴，非公恐失傳。公以同族里，代異氣相連。先烈固多艱，公亦歷烽煙。幾度流離日，輜軒苦稽延。夙願終能償，真不負在天。滔滔崖門水，無窮接潁川。仿修十郡志，彰美在爲先。宛寫四部書，莊嚴尤萬千。風前載拜讀，語語動心絃。燈下每摩挲，筆筆像璣璿。一帙成雙璧，高並泰山巔。一帙亦雙寶，先生北斗邊。傳之以宗族，垂後與光前。傳之於鄉邦，香火百世然。藏之在名山，不讓太史遷。

贈週末茶敘同座沈東強沈君與余同董學海書樓事多年因而及之

書樓同接席，雅座復談天。學海將安望，茶經喜共研。不須求極品，只樂佐閒篇。幾許盧仝客，風生賽酒仙。

洛杉磯晚芳詩社詩人節雅集寄呈

他鄉日午又題詩，爲紀三閩澤畔時。懸艾浴蘭猶有夢，分籌賡韻更臨池。離騷讀後情何似，蒲酒當前醉莫辭。競渡如聞旗鼓遠，一堂冠冕幾神馳。

香江卽事爲健社雅集課題按該社始設於一九五一年距今凡四十四年矣當年創辦人如中山李星階古卓崙東莞鄧爾疋三水周謙牧茂名江蹀雲番禺張叔儻邑彥潘學增等皆已作古

太平山下太平洋，送往迎來孰最強。博彩爭臨快活谷，聽歌競到大球場。千金買得留春醉，兩翼凌空又遠揚。百載繁華同若夢，幾家晴雨過尋常。

加路連山道香港政府大球場歸市政局管理爲開源計將其兩用可表演歌唱

侯斯頓中國美術會會長趙青坪伉儷於蒲月旋港早茗於龍城食爲先酒家同座有碩果社前輩九五老人黃相華鄉丈嶺南藝苑學長趙世光胡昌碩香港中國美術會同事蕭友梅詞人陳潘思敏暨鄉丈鏗齋家叔惠幼惠昆仲茗後同過嶺南藝苑欣蒙趙師賜見賦此紀之

江山無限任從容，離會隨緣笑語中。蟹眼一壺忘冷煖，駒光彈指話西東。歸鴻喜晤如仙眷，接席還多不老翁。茗後同過松雪苑，一堂書畫滿天風。

爲鍾石泉藏張大千畫展於南韓有集屬題

蜀郡有雙雄，一堂號大風，色空三月後，出入百家中。早得敦煌秘，遍參天地工，閒居精舍日，潑墨到無窮。

大千居士少年曾出家爲僧三月後還俗與兄張善孖篤志書畫遍遊中外名山大川晚年終老臺北大風堂與摩耶精舍乃大千居士畫室名稱

爲劉春草牡丹國畫展於濠江

本同桃李出尋常，却冠群芳賴姓楊，自得劉郎傳妙筆，人間到處有天香。

小暑日家叔惠以手卷屬題

龍城有茗座，雅號食爲先。主人欣邑彥，欵待倍怡然。吾宗思源者，其弟幼惠同象賢。周

末每齊來，說地與談天。語語書香氣，首開此吟箋，箋長逾丈餘，寓意到綿綿。缺齋梁耀明

稱善哉，一揮響其前。琅琅廿八字，字字像瑚璉。泰然而往來，繼有醉茶齋主陳泰來號接吟鞭。

細數座上人，相華最大年。尚齒方九五，春秋碩果兩詩社名載滿篇。棧翁承家學，祖述李文田。

偶來談甲骨，咳唾落甌邊。秉昌謙謙子，向喜樂山川。歸必滿奚囊，舉座輒垂涎。錦培譚

大叔，常與結遊緣。大叔擅獵影，好詩並影傳。詞人推茹香，蓮駕足翩翩。爲傳蘊廬稿，

時來共一研。子予姓袁氏，詞學亦其專。託意勿須論，總佐酪奴煎。國明間倚聲，遠宗李

青蓮。是嫻乎六法，引壺若湧泉。沈君東陽氏，有婦乘畫船。氣味因相聯，況與書樓多周

旋。風雨幾廬全，清晨癖茶煙。自有隨緣客，借此論經筵。所論只茶經，別無音外絃。人

生貴閒豫，不必市上酒家眠。人生最難得，蟹眼魚眼學坡仙。我幸叨末席，一飲忘百牽。

百牽且忘時，不自量而動吟肩。

抗日戰爭勝利五十周年紀念寄順德市書法家協會又寄深圳市老齡人書畫會

八年浩劫痛當時，血滿長城野滿尸。底事人間瀕地獄，全因禍首出蝦夷。幾經待旦疑無望，

一覺回天幸有期。畢竟深仇將甚了，惟憑仁義化狂痴。

不晤羅丈竹坪多日忽以達和而康復來會午茗席間出示五十年前馮康侯先生治印雞血紅

石小章一枚邊款上刻有和平奠定康侯將去濠江爲竹平刻以誌別字樣按抗日戰爭時不少

文藝前輩流寓此間竹坪原名竹平後爲其師高劍父先生所正今名

一石高盈寸，縱橫僅五分。馬交留此別，雞血篆多文。署白真神技，鈐朱直宋斤。摩挲無

限意，恍見漢將軍。

指東漢時代天水太守馮異每於朝廷論功時眾皆企望封贈惟異獨立大樹下不誇己績乃有大樹將軍之號此喻康翁有先世風度

秋日香江客寓晨坐

一雨驚秋至，涼風滲我襟。坐看蘭桂下，忽動國鄉心。朋舊嗟存歿，江山自古今。茶清漾髮白，微恨浪分陰。

竹

漫笑居蘭後，多經種佛前。枝枝齊拔地，葉葉合冬天。挹露俱花好，凌霜並柏堅。平安到老日，史筆賴君傳。

荷

年年生日滿橫塘，一夕秋聲老六郎。畫舫誰知歸甚處，香風不識到何方。絲連總覺根猶在，花落還憐草亦黃。擎雨依然餘幾蓋，悠悠天地尚昂藏。

乙亥閏中秋爲愉社雅集命題次鄉丈陳泰階韻

百代光陰盡向前，惟憑一閏可回天。逢場詩酒相邀際，近水樓臺又得先。世事任教終或缺，人生總惜在重圓。舉杯試作從頭約，似覩嫦娥啖啖煙。

又應鏗齋鄉丈小山社長索苦澗爲舉杯邀飲之會步小山韻

天涯有約共良辰，秋水無邊不染塵。又喜嬋娟同萬里，載將詩酒會高人。江山似此前曾識，物我相忘始悟真。醉裏乾坤何所願，長娛視聽在清新。

香港美術研究會會員作品展贈趙世光李汎萍二位學長

亦畫亦書繡嶺南，功同造化筆同參，無邊藝海無邊月，更有青青競出藍。

全球漢詩大會第五屆在星洲舉行張濟川寄詩屬和次韻答之

南北西東會有期，獅城此日競題詩。重逢喜值迎重九，愈出欣然見愈奇。五屆天聲同嗣響，千杯菊酒勸相持。江山代有才人出，管領風騷莫論時。

潘君小山以九日登太平山茶亭四律寄示次第三韻答之

笑我栖遲老管城，又逢佳節步陰晴。但求晚菊能相就，漫數寒衣已幾更。載酒題糕仍夢寐，思歸念昔輒心旌。晨行強向北峰望，盧墓空懷掃葉聲。

先君棄養六十周年泣作先君歿於一九三五年夏曆九月十四日

泣血椎心痛此辰，尤哀祖母淚沾巾。祖母繫以白頭人送黑頭人因大哭階前存亡顛倒曷其極，喪亂安甯世幾新。每念在天風木甚，空悲去日夢魂頻。餘生僅足先靈告，膚髮猶存但老身。

麥寶林鄉士教澤功深文藝淵博擅詩詞書畫賦此贈之寄大良

耕織盛吾鄉，經綸歲月長。自然多庶士，乃及藝縑緗。君顯承餘韻，筆歌起眾香。淋漓師造化，點點盡文章。

題譚君伯平影集君亦善書并著有墨竹基本技法乙冊

煙霞嘯傲御風遊，萬里溪山一匣收。傳彩仿同源六法，象形不異出雙鈞。宜詩且富王維意，破墨分明鄭變儔。展冊喜觀無盡藏，等閑囊括百花洲。

袁文瀾樞屬題其女弟馮佩紅書畫展

閨閣才華並慧中，硯池筆架海山同，通靈入妙參天地，一畫一書管憚風。

多倫多第六屆詩畫琴棋雅集索書

詩畫琴棋六度開，一堂如又登春臺。酒香恰並楓林醉，聲韻宛從天上來。下筆還多摩詰妙，臨風不盡子雲才。橫車躍馬知何意，再世陳搏亦勇哉。據錦秀中華載傳說宋代開國皇帝趙匡胤在浪跡江湖時曾經在西嶽華山一座亭子內與隱士陳搏老祖

希夷先生下棋結果趙匡胤敗北使信口謂將此座華山輸給陳搏老祖當時趙匡胤沒想到自己真有黃袍加身之日到登帝位後便不能不履行諾言亭內鐵鑄棋局至今猶在云

趙世光八秩壽辰舉行前瞻畫展於香港文化中心

藝海悠悠五十年，君於抗戰勝利即解甲定居香江從事文教杖朝欣遇小春天。亦詩亦畫榮喬梓，君有子令彬亦工六法達己

達人志聖賢。介壽弗忘投筆日，瞻前益盛輔仁篇。華堂今喜以文會，松雪流風遍大千。

羅丈竹坪以前月所示五十年前馮康侯先生將去濠江誌別印章一枚轉贈丈蓋以當年亦名

竹平現以余爲切用因而割愛誠不易得因步前韻并書便面以謝之

君我原同字，宗枝各自分。他山常及我，（丈於前年亦曾將刻有竹平二字舊印及章石多方相贈）二字又篆文。其體雖盈寸，而神重萬斤。摩挲無限意，尤憶歷兵塵。

孫中山先生一百三十周年誕辰紀念應健社命題

爲拯生民振國風，天將大任付孫公。內憂外患艱危日，碧血黃花勝敗中。長夜尚留蒙難記，千秋合並大成崇。孫公生平常寫禮運大同篇以標榜民主而今得邁文明路，都賴當年挈領功。

十月之望訪候蘇文擢回家幼惠乃文詩盟陳卓鄺美顏

又到城河畔，同薰禮部風。君之父冬心公官歷禮部主事登堂參至聖，君居沙田城門河畔富豪花園大廈堂上奉有巴西以皮革灼孔子像笑語接坡公。漫管驅魔外，惟珍養氣中。君病中而神態安靜窗前相勸茗，一室倍融融。

羅丈竹坪以辛卯（公元一九五一年）李研山先生繪贈竹石圖移賜賦此以存永好

棉市美風俗，研公歷任廣州市立美術學校校長多年香江教化時。研公爲香港中國美術會首任主席羹牆方在念，茗畔值相知。尺幅移貽賞，高風竟可儀。湘竿參壽石，意遠祝期頤。

健康爲健社雅集第五二四會課藝

小極誰能免，從來重預防。易云強不息，語曰壽而康。不息由行健，壽康賴敬莊。順時安命日，最是養生方。

訪楊善深寶山道寶山山房承賜手書一榜聯賦此酬之

寶山真有耐寒松，冬日騰騰尚煖風。草色青簾高士宅，鳥鳴喬木畫圖中。寸金尺玉原安望，大筆鴻題竟厚蒙。此際情天千萬仞，墨香彷彿並無窮。

觀余元佳千尺香江圖卷後

一畫長千尺，經營豈等閒。北起沙頭角，南極赤柱灘。百載幾滄桑，妙筆括一環。迂迴落東西，不盡水與山。水上原居民，東望舟往還。山高奉大佛，西眺轟天壇。大霧形峭拔，鯉峽狀安瀾。村屋煙縷縷，荒墟成市閭。或更排雲出，氣象逼天關。幾許崎嶇路。爲眾解行難。多少繁陰地，能補一面慳。正觀春花發，又賞秋葉斑。方如履平蕪，忽似步危闌。林林松與柏，歷歷水之灣。一堂方半日，半生有未攀。論法誰能匹，觀者同驚歎。論工費八載，可曾更忘餐。願此東方珠，世事翻幾番。願此東方珠，來日倍新顏。

悼鄉丈李曲齋丈居穗市祖宅泰華樓常主當地文藝年前曾聯袂往展日本回程經港時復出所作爲以文之會不幸於歲之冬至後八日病歿春秋八十

抱璞酣書泰華樓，忽驚絕筆紀春秋。雲山宛點傷心色，珠海感同濺淚流。正念難兄難弟際，益浮滿地滿天愁。不忘更在東歸日，一會竟成藝永留。

大寒前與學海書樓創辦人賴際熙太史哲嗣恬昌同游南番順三市歸後作賴君乃增城人也

落落同歸攬勝區，禺山南順幾停車。方參祖廟過禪市，回望沙灣聚族居。園滿清暉猶尚雅，靈光聖殿復沖虛。

青雲公園
內大成殿

鄉風不盡流連感，況是通街賣酒魚。

壽陳泰階鄉丈九秩星輝步丈寄示乙亥愉社餞歲元韻有句九十情懷依舊在歡場樂事定重來相逢盡在笑顏開，有話多從陸羽回。步若閒雲方出岫，心如明鏡亦非臺。無求復住添籌屋，式飲常稱介壽杯。愧我未曾親祝嘏，十年願頌頤頤來。

昌社稚集餞歲鑽石酒樓

今宵同餞臘，指日又迎年。酒可甘居後，詩宜寫向前。珠還將不遠，眾望亦當然。燈火樓臺外，融融欲暖天。